



ENJOY FASTEST
INTERNET SPEED



24/7 Customer Care: Call 345 6789 or www.telikompng.com.pg

Conditions Apply

BIKPLA TOP UP
PROMOSEN TRU
BLO PNG

Taim you Top Up wantaim K2 o moa, bai you kisim entri long go insait long wanpla laki draw lo wimin 1pla blo 8pla Land Cruisers na tu yu bai go insait long draw lo sharim ol prizes inap long K1 million moni mak.



DIGICEL SUPER 8

WINIM WANPLA LAND CRUISER OLGETA BIK INAP LONG 8PLA WIK

WANTAIM K1 MILLION TOP UP LD GIVEAWAY

3G DIGICELPNG.COM

Digicel

Terms and conditions apply. Promotion is from May 13 to July 10. Prepaid Customers earn unique entries for topping up with a minimum of K2 and will qualify for the next day's draw for Free Call & SMS Credits. Top ups should be made between 00:00H Wednesday to 23:59H Tuesday of each week to qualify for the Land Cruiser draw on the following Wednesday. All entries expire at 00:00H every Wednesday (beginning May 22). Customers need to top up again to qualify for the next Land Cruiser draw. To check entries, dial *140#. For the complete Terms & Conditions, please refer to Digicel website www.digicelpng.com.



SARENDA: Ol yut long Not Mekeo i kam long fran bilong ol Polis, Yut lida, Pater, Pastor wantaim long Dairekta Jeneral bilong Nesenel Nakotiks Buro, John Mapusa long lusim ol mariwana ol save groim na salim long haiwe bilong Mekeo long Trinde dispela wik. Dispela de tu olgeta hap long wol na Papua Niugini bin makim dispela de olsem Intanesenel De long pait agensim drag.
Poto Nicky Bernard.


**NHC wokman kisim
4-pela de profesenel
in haus trening - p2**

**Kisim pepa long
stop drag long
komyuniti - p7**

**Bihainim
haiwe bus i go
kamap long
Tabubil - p15**



**Braised Steak
na Vejtabol**



Abus Yah!!

Lens Dipatmen gat K140m dinau long peim tumbuna graun

Stanley Nondol i raitim

DIPATMEN bilong Lens na Pisikal Plening i tokaut olsem em gat K140m dinau stap yet long peim tumbuna graun na nidim mani mak olsem K50 milian long wok administresen bilong long mekim karim kaikai Visin 2050 bilong gavman.

Minista lukautim Lens dipatmen Benny Allan, i tok aninit long visin 2050 plen bilong gavman, dipatmen i gat nid long baim 20% bilong tumbuna graun o kastomari graun we nau stap long 3%. Em tok moa olsem, long mekim gut wok aninit long visin 2050, dipatmen i nidim moa long K13.5 milian we gavman tokaut long givim.

Minista Allan i tok dipatmen i gat dinau long K140 milian long peim ol papagraun we dipatmen i kisim tumbuna graun na givim long gavman. Em tok dipatmen nau wok

stap long kisim graun long taun na siti we nogat wok developmen kamap na slip nating stap na givim long gavman.

Wanepela rot long dipatmen bai gat inap mani long mekim wok em long rent mani we em save kisim tasol Nesenel Eksektiv Kaunsil i salim sabmisin pepa bilong dipatmen long holim 50% bilong rent mani long dipatmen yet long mekim wok. Minista Allan tok em gat bilip olsem dispela sabminis pepa bai go long ai bilong palamen long kisim tok orait long dipatmen i ken olim 50% bilong rent mani.

Moa long en Minista Allan tok dipatmen tu gat bikipela hevi bilong korapsen long administresen na dispela em bikipela tru.

Minista Allan i mekim ol dispela tokotk long lonsing bilong 2013-2017 Koporet plen bilong dipatmen long las wik long Pot Mosbi.

Memba bilong Ungai Bena i

mekim strongpela toktok i go long ol wakman bilong em long dipatmen long ol mas noken tru mekim pasin korapsen. Em tokim ol wokman long mekim gut wok na senism nem nogat we dipatmen gat pinis long ai bilong pablik.

Bikipela toktok i raunpinis olsem lens dipatmen em korapt. Planti komplek we Pablik Akaun komiti i kisim na nau wok yet em bikipela korap pasin we lukim ol wok man bilong dipatmen save paulim ol pail insait na senisim ol taitol bilong guan.

I gat palnti komplek olsem, i gat tupela o moa taitol, long wanpela propeti, na diapela hevi em minista Aallan tok em Ministriel Tas Fos bai go pas na lukluk. Minista Allan tu tok sampela senis long Lens bot memba bikos planti korapsen stap na em wari tru long nem nogut we lens dipatmen i kisim long planti yai go pinis.

Meri Porgera winim Toyota Land Crusier wantaim Digicel

WANPELA single mama bilong Porgera long Enga provins long aste i winim Toyota Land Crusier wantaim Digicel long Supa 8 promosen we Digicel kamapim na em namba 6 wina bilong kompetisen.

Erikcka Lellie Michael, em mama bilong wanpela pikinini i tok em i no bilip olsem em winim Toyota Land Crusier, kar we Ela Motos salim moa long K100, 000.

Taim Digicel i kolim em na laik toksave long em olsem em winim nupela kar, Ericka i no bilip tru na em bin tekim sampla taim long dispela nius go gut long bodi bilong em.

Mama bilong wanpela pikinini ya tok em bin mekim planti top ap long dispela wik long K20,K30,na K40. Ol lain bilong em tok em westim mani na taim bilong em long top ap tasol em tok em bin

mekim yet na nau lukim kaikai bilong em. Em gat 10 sita Toyota Land Crisier, husat bai tok nogat?

Ericka tok bikipela tenkyu tru i go long Digicel na tok em bikipela sapota bilong Digicel na bai apim nem bilong Digicel yet. Em tok Digicel em nambawan long PNG.

Mis Michael tok em bin nidim kar stret.

Em wok wantaim Barrick Porgera na pastaim em bin wok olsem tisa long Paiam Praimeri Skul long Porgera yet.

Dispela supa 8 promosen bai pinis long tupela wik taim.

Wanpela rot tasol long winim Toyota Land Crusier em long top ap wantaim Digicel pon long K2 go anatp na kastoma bai go insait long dro long winim kar we stap long mani mak moa long K100,000 long Ela Motos.

NHC wokman kisim 4-pela de profesenel in haus trening

NESENEL Hausing Koporesen i gat bikipela wok long mekim long rausim nem nogut we pablik save olsen em wanpela korap bodi long gavman.

Ekting Menesing Darekta John Dege i wok hat tru long dispela taim nau long putim bek gutpela nem na

laikim huasing Korporesen bai mekim wok stret long wok gavman i laikim long en long stretim hausin hevi long kantri.

Mista Dege i save long wanem samting em bai mekim. Em yet nonap mekim olgeta wok o i no man long au-

sait bai mekim. Olsem na em i stat long putim ol wokman bilong em long trening long ol i ken kisim gutpela o moa save long mekim wok we em laikim na bai em ken soim kantri olsem NHC em stap long raitpela rot long givim sevis long ol pipel.

Ol 10-pela sinia menesa long het opis long Mosbi, nem bilong ol, Lucy Kairi,Victoria Fane, Ruby Kaidoga, Samuel Kave, John Emena, Michael Loi, Christopher Tamu, Philip Kama, Albert Vain na Kei Tewana pinisim 4 de profesenel in-haus kos long tude dispela wik na kisim setifiket long aste.

Dispela kos taitol em akunting bilong nan akuanten we Leksa bilong UPNG skul bilong Bisnis, Hermen Moshi i ronim.

Mista Dege tok em stat bilong NHC long stretim rot bilong em



NHC managing director John Dege na kos instrakta Herman Moshi na sinia menesmen wo man husat pinisim kos long Tude dispela wik.

long givim sevis long kantri.

Mista Moshi tok dispela em kos bilong husat em i no akaun-

ten na em ken helipim tru, sapos ol laik ronim bisnis bilong ol yet.

Rudd rausim Gillard olsem Labor lida



KEVIN Rudd i rausim na senisim pinis Julia Gillard, olsem lida bilong Labor pati long Australia.

Dispela vot em i namba tri taim Labor lidasip i bin pait bihain long Mis Gillard i bin rausim Mista Rudd long 2010.

Asde nait, Kevin Rudd i kisim 57 vot, na Gillard i kisim 45 vot tasol.

Dispela nau i stretim rot bilong Rudd long holim gen wok praim minista.

Na olsem wanem nau long Gillard?

Long asde apinun, Gillard i bin singautim wanpela lidasip vot,

wantaim tok lukaut olsem em i orait long bungim salens bilong Rudd, na husat i lus long dispela vot, bai mas tok orait long lusim wok politiks, na i noken sanap resis long ileksen dispela yia.

Deputi Praim Minista, Wayne Swan na Senet lida Stephen Conroy, wantaim Joe Ludwig na Craig Emerson i lusim kabinet bihainim vot.

Atoni-Jeneral Mark Dreyfus, i tok em bai no inap risain, na em i gutpela long em i holim wok insait long gavman bilong Labor, maski husat i lida.

Giaman pasin o scam bilong ovasis i daunim planti PNG manmeri

Pasin giaman long ovasis i paulim planti Papua Niugini man na meri hia insait long kantri.

Olsem Kimilien kina i bin paul i go long ol giaman bisnisman o kampani long ovasis kantri olsem Nigeria, United Kindom na long Philipines.

Planti ol bikman bilong yumi i pundaun pinis long dispela ol giaman grup na ol i lusim planti planti long sevins bilong ol.

Wanpela em i olupela minista na memba palamen, na tu wanpela bikman polisman husat i bin wari long dispela na em i sik na dai pinis.

Planti depatmen het bilong gavman tu i lusim mani long ol dispela giamn bisnis man long ovasis. Wanpela Papua Niugini meri husat i lusim PNG na go stap long Australia wantaim man

bilong em 15pela yia i go pinis tu i kamap wanpela bilong ol lain husat i lusim planti moni pinis long dispela giaman pasin.

Em i pundaun tru long dispela online long intanet we yu painim man o meri we yutupela i ken salim pas i go i kam long soim lav bilong yutupela i lusim K20,000 long dispela giaman man husat i tok tupela bai marit.

Dispela ol giaman lain bai giamanim ol na tokim ol salim moni long Monigram o Western Union long Benk.

K250,000 em wanpela meri i bin salim long benk taim ol i giamanim em olsem em i winim K13milien pound long lottery long UK.

Wankain pasin tu i kamap long wanpela palamen memba husat i salim K120,000 long hausing

trensfe, K50,000 long halivim wanpela meri husat i pas long ples bilong bikipela woa i kamap long Syriaana i no inap kisim moni bilong papa bilong em husat i wanpela milienea na em i dai pinis.

Em laikim wanpela man o meri husat i ken trastim em na em bai salim dispela mani i go long akaun bilong ol na K30,000 na K10,000 bai go long stok tred long United Kingdom.

Planti husat i bin stap long dispela giaman i go long Polis bilong yumi tasol ol polis bilong yumi nogat we long painim ol dispela lain o netwok na sasim ol giaman lain long ovasis.

Dispela wok glasim i wok long kamap nau wantaim ol polis na ovasis polis long ol dispela kantri.

PNG gavman mas yusim gut winmani na sapotim liklik bisnis: ADB

Stanley Nondol i raitim

PRESIDEN bilong Esian Developmen Benk, Takehiko Nakao, i salesim PNG gavman long yusim gut inkam o winmani bilong kantri, stretim ol infra-straksa na salim moa ro material go aut na sapotim liklik bisnis long growim ekonomi bilong kantri.

Presiden Nakao i tok, long lukim pipel bilong PNG na kantri groa, na lukim planti pipel stap insait long bisnis long growim ekonomi, PNG gavman mas yusim gut inkam bilong kantri long stretim ol infrstraksa developmen.

Em tok PNG gavman mas konektim gut ekonomi long olgeta hap long kantri, na tu, mas skelim gut inkam long baset long mekim olgeta pipel mas kisim sevis bilong gavman na tu long growim ekonomi.

Presiden Nakao i mekim dispela tokok long tupela de raun bilong em long Papua Niugini we em i bungim ol bikman bilong gavman na bisnis insait long kantri na tu lukluk raun long tupela bikpela projek bilong ADB.

Long Mande dispela wik, em i kam long kantri na bungim PNG Paim Minista Peter O'Neill, Tresari minista Don Polye, Minista bilong Nesenel Plening, Charles Abel, na ol sampela bikman bilong gavman na tu developmen patna we ol i tokotk long developmen we ADB na PNG bai mekim long developim Papua Niugini.

Taim PNG joinim ADB long 1971, em i kisim 75 lon

o dinau we stap moa long \$1.5 bilian o moa long K4.5 bilian na tu kisim ADB gren long \$15 bilian na 148 teknikel asistens long ol projek we mani mak stap moa long \$ 62.8 bilian. PNG em bikpela patna bilong ADB long Pasifik long sait bilong lon o dinau long developim pablik na praivet sekta.

Presiden Nakao tokim Pot Mosbi Semba bilong Komes olsem PNG mas lukluk moa long salim o expotim ol ro matirial i go aut long kantri na tu lukluk long surukim nupela teknoloji o save olsem mobail telekomunikesen long opim rot bilong bisnis long helim sevis bilong helt, edukesen na ol arapela sosel sevis.

Presiden Nakao i tok moa strong olsem PNG nid long wok hat long sapotim ol liklik bisnis bilong ol pipel long sait bilong mani na helpim long growim liklik bisnis na dispela tasol bai pilaim bikpela pat long growim ekonomi long kantri.

Long tupela de raun bilong presiden long Jun 24 na 25, em go lukluk raun long Rouna Pawa Stesen long Sogeri long Sentrel provins we ADB bin fandim taim em kisim sia bilong presiden long dispela yia na tu visitm Jackson ples balus we nau wok stretim i kamap yet wantaim halivim bilong ADB.

Dispela kam bilong ADB presiden long kantri em namba wan raun bilong presiden Nakao long go aut long ol kantri long wol na tok PNG gat planti sans long kamap bikpela long ekonomi long Pasifik na tok ADB i lukluk long givim moa sapot.



Bossman bilong olgeta bles balus long kantri Joseph Kintau i tokotk long Presiden bilong ADB Takehiko Nakao long nupela projek hap long Jackson ples balus long pot Mosbi we ADB i fandim.

wantok moni

Send money to Anyone, Anytime Anywhere



How to send Wantok Moni

- 1 Dial *131#
- 2 Enter mPIN
- 3 Press 2 for "Funds Transfer"
- 4 Press 3 for "Wantok Moni"
- 5 Choose Account which you will send Wantok Moni from
- 6 Enter recipient's mobile number
- 7 Enter Amount
- 8 Press 1 to confirm

Have you received Wantok Moni?

- 1 To Accept Wantok Moni
 1. Dial *131#
 2. If you are a new user, you will be asked to enter a 4-digit Personal Identification Number (PIN).
 3. If you're an existing User, you will be asked to Enter and confirm your 4-digit PIN (this is different from the send code)
 4. Reply 1 to "Accept Wantok Moni" ENTER the Sender's SEND code and the SEND code that you generated
- 2 To generate a Wantok Moni Withdrawal Code
 1. Dial *131#
 2. Enter and confirm your 4-digit PIN
 3. Reply 2 to "Withdraw Wantok Moni"
 4. Reply 1 - to Generate Code
 5. You will receive a response, containing your WITHDRAWAL CODE



Anyone, Anytime, Anywhere!

320 1212 / 7030 1212
servicebsp@bsp.com.pg
www.bsp.com.pg



Official Sponsor of the 2015 Pacific Games


Air Niugini introduces Online check-in

How to Check-in Online

- Visit www.airniugini.com.pg
- Refer the Flight Booking panel on the left hand side of the page
- Click on 'My Flight' tab
- Fill in the blank fields and then click on 'Check in' button
- Follow prompts to progress your online check in

*NB: Online check-in is available 24hours to 3hours before departure.

- On completion, your boarding pass and important instructions are emailed to your nominated email address
- Bag Drop: If you are travelling with bags, proceed to the 'Online Check In' Counter (where available). Your bags will be weighed and bag tags issued.



Making your travel experience more convenient!



www.airniugini.com.pg

FRI INTANET KONEKSEN

Oi Telikom kastoma i gat telepon lain i go long ol haus bilong ol nau I gat gupela sans long sainap long kisim fri intanet koneksen long telepon lain bilong ol.

● Telefonintanet I gat;

- Spit bilong em inap long 2Mbps
- WiFiling konektim planti lain i yusim ol komputa na ol smat fon
- Em i trupela intanet sevis bi-long PNG

● Sainim na kisim nau, nogut yu misaut

- FRI Lokal Vois Kol inap long 1 mun
- Baim Top Ap na yu ken kisim Inap long 200 pesen bonas
- Isi long setup/ i no longpela taim long setup

Winim trip long lukim Mansesta Yunaited.

Kamap wanpela laki wina long kisim trip long go lukim Mansesta Yunaited i kisim A-Lig Oi Sta long ANZ Stediu, Sidni long mun Julai.

Oi Prai i stap olsem

- Wanpela Gem Pas
- Wanpela balus tiket bilong go na kam
- 2 nait akomadesen
- Poket mani bilong wokabaut

Bai yu Win olsem

Yusim K200 long baim wanpela o moa Telikom Prodak long ol Telikom Stua, raitim nem na adres bilong yu long baksait bilong stua risit, na tromoi i go long wanpela bokis insait long ol Telikom Stua na bai yu go insait long dro.

19t/MB

Hamamas wantaim 19 toea pripei long daun taim intanet ret long 7 kilok moning go 7 kilok nait na nogat stop long namel.

Yu laik save moa, ringim 24/7 Kastoma Ke long telefon 3456789.



Wewak distrik kamapim 5 yia developmen plen

Paul Fuzo i raitim

WEWAK Distrik Administrasen insait long Is Sepik Provins i kamapim pinis 5yia divelopmen bilong em. Dispel 5yia developmen plan em Minista bilong Plening na Monitoring, Charles Abel, i bin lonsim long Wewak long las wik Trinde.

Distrik Edministreta bilong Wewak, Ricky Wabar, insait long welkam toktok bilong em i tok, distrik bilong em i kisim bikpela amamas long lukim Minista Abel na Hon. Memba bilong Wewak na

Minista bilong CIS, Jim Simatab long kamap na lonsim 5 yia Distrik Plen 2013-2017 bilong Wewak Distrik.

Em i tok Wewak Distrik em i nambawan distrik nau insait long Is Sepik Provins husat i gat opisel Distrik Plen. Dispela plan em bai sanap olsem rot mak we distrik bai bihainim long givim sevis i go long pipel.

Em i tok, dispela plen i bilong ol pipel bilong wanem, ol pipel yet bin givim long ol opisa bilong gavman taim ol opisa ibin mekim wok painim out long ol hevi bilong ol

pipel insait long 5-pela LLG bilong Wewak distrik.

Mr. Wabar i tok dispel a plen em i sut stret long inapim bikpela het tingting bilong nesenell gavman polisi rot mak we i redi long mekim i karim kaikai insait long dispela yia 2013 i go 2017.

Em i givim bikpela salens i go long ol opisa bilong em long karim out gut wok bilong ol na mekim dispela plen i mas wok, na sevis i mas go long ol pipel bilong Wewak Distrik.

Mista Wabar i amamas tu long lukim 4-pela donesen i kam long

Memba Simatab aninit long JDP PBC we i lukim wanpela bot i go long Boram CIS, wanpela kar i go long Wewak Distrik Healt, narapela kar i go long Hawain Vokesenal senta na narapela kar i go long Dogur kindam project.

Em i amamas tu long K100,000 we Minista Abel i komitim tu i go long Dogur Kindam Projek.

Mista Wabar i givim bikpela tok tenkyu i go long olgeta pipel bilong Wewak Distrik, na tu long ol opisa bilong em husat i bin mekim dispela bikpela de i kamap gupela stret.



AHI LLG MERI: Hia em ol meri Ahi Lokol Level Gavman (LLG) long Morobe Provins i bung long selebretim de bilong ol. **Poto: Paulus Tali**

Votim ol gupela lida bai bringim sevis

Michael Novingu i raitim

NOMINESEN o putim nem long resis long Lokol Level Gavman (LLG) ileksen long Is Nu Briten i pas long las wik Fraide 4 klok apinun bihain long Ilektrik Komisana, Andrew Trawen, i surukim i go long narapela tupela de.

Siaman bilong provinsel lokol level gavman (LLG) ileksen stiarng komiti, Edward Lamur, i tok ol dro long ol kendidet i bin sapos long kamap long las wik Sarere long Vunapope Katolik haus kibung, tasol i no kamap bikos sampela samting i no stret.

Mista Lamur i tok tupela meya o bikpela sia long Kokopo na Rabaul taun na 16-pela rurel LLG presiden wantaim em 357 wod kaunsela bai i resis long winim ol sia long en.

Em i tok i gat 98 poling tim i redi pinis long karimaut wok bilong poling.

Moa yet, em i tok ol dispela poling wok lain bai karimaut wok bilong ol 4-pela distrik long Is Nu Briten long

taim bilong LLG ileksen.

Mista Lamur i tok 3-pela meri i putim nem bilong ol long resis long Taulil wod insait long Gesel distrik. Em i tok meya sia long Kokopo na Rabaul em wanpela meri i putim nem long resis long sia bilong Rabaul taun meya, na arapela meri gen i putim nem long resis long presiden sia long Kombiu LLG long Rabaul distrik.

Em i tok olsem em i amamas long lukim ol meri putim nem long resis long LLG ileksen bikos ol meri i stap insait long provinsel asembli bai mekim senis insait long ol komyuniti.

Long wankain taim, bosman bilong ileksen opis long Is Nu Briten, Job Voivoi, i tok nominesen long resis long LLG ileksen i pas pinis long las wik Fraide.

Em i tok kempen bai stat stret na pinis long Julai 6, 2013 na poling bai stat long Ogas 9, 2013 na bai ol i kaunim ol vot na kisim ol kendidet i win o riten ov rits i go long provinsel asembli long Ogas 30, 2013.

Mista Voivoi i singaut long ol kendidet long kempen long trupela na stretpela pasin, na noken

yusim pasin nogut long bagarapim ol kendidet.

Long wankain taim, Ekting bosman bilong polis long Is Nu Briten, Inspekta David Yapu, i tok ol bai putim long 80 polis manmeri ol bai putim 2-pela long wan wan LLG long lukautim wok bilong poling.

Moa, em i tok 5-pela tas fos polisman bai stap tu long 4-pela LLG long lukim olsem nogat manmeri i brukim loa long taim bilong poling.

Mista Yapu i tok tenkyu long Is Nu Briten LLG stiarng komiti long luksave long wok bilong polis long provins na helpim ol long mani na ol arapela samting long karimaut wok bilong ol long taim bilong LLG ileksen.

Em i tok polis dipatmen i no luksave long helpim long ol long mekim wok bilong ol insait long provins.

Yapu i singaut long ol manmeri long vot long trupela na stretpela lida na em i ken winim ileksen, na em bai kisim sevis i go long ol komyuniti bilong ol long kirapim gupela sindaun bilong ol.

ENB lusim wanpela gupela lida

Michael Novingu i raitim

IS Nu Briten Provins i stap wantaim sori na wari bikos presiden bilong Watom Lokol Level Gavman (LLG) long Rabaul Distrik, Samuel Billy Niba, i dai long las wik Fonde.

Mista Billy i dai long 10 klok moning bihain em i gat sik long bodi bilong em long taim bilong rits i op long putim nem long resis long sia bilong presiden long Watom LLG long Rabaul distrik.

Em i kam long Rau ples long Watom Ailan long Us Nu Briten Provins (ENB) na i holim wok olsem LLG presiden long tupela tem.

Em bin laik resis gen long kisim bek sia bilong em long 2013, tasol em i dai pinis.

Gavana bilong Is Nu Briten, Ereman ToBaining Junia, long funere lotu bilong em long Vunadidir Provinsel Asembli i tok leit Billy em i wanpela man i gat daun pasin na man bilong wok hat long kisim divelopmen i go long komyuniti bilong em long Watom Ailan na ENB wantaim.

To Baining i tok Leit Billy i siaman bilong helt sevis long Is Nu Briten Provinsel Asembli we em i mekim planti gupela wok long kirapim na kisim wok bilong helt sevis i go long pipel bilong Watom, Rabaul na pipel bilong Is Nu Briten.

Moa yet, em i tok ENB i lusim wanpela gupela saveman long karim aut wok bilong helt long kirapim gupela sindaun bilong ol manmeri long ol komyuniti bilong ol.

To Baining i tok em i lukautim wok bilong HIV/AIDS, TB na ol arapela wok bilong helt long provinsel asembli i ron gut we i lukim planti manmeri i kisim helt sevis long ol komyuniti bilong ol.

Long wankain taim Deputi Praim Minista na Rijinel memba bilong Is Nu Briten, Leo Dion, i tok leit Billy em i wanpela man bilong wok hat tru, na i gat daun pasin long laikim manmeri bilong em i mas kisim gupela helt sevis long lukautim sindaun bilong ol.

Mista Dion i tok taim em i stap gavana bilong provins, em bin makim Billy i go insait long provinsel asembli long holim wok olsem siaman bilong humen risos long 2002, na bihain em i holim wok olsem siaman bilong helt long 2007.

Pablik seven mas tok nogat long korap pasin

WOK bilong pablik seven em long givim gupela sevis long pipel, na ol mas mekim wok aninit long loa bilong kantri we banisim wok bilong ol lukautim pablik propeti na aset stap aninit long lukaut bilong ol.

Ekting Dairekta bilong Dipatmen bilong Implementesen na Rurel Developmen o DIRD, Paul Sai'i, i givim ol kain strongpela toktok long gradusen bilong staf bilong dipatmen bilong em long las wik long Pot Mosbi, taim ol i pinisim wan wik indaksen kos bilong pablik seven.

Mista Sai'i em save go pas long lukautim olgeta projek proposel we olgeta distrik na provins save salim long kisim mani bilong DSIP na PSIP na ol arapela projek bilong pablik, i tok wok bilong pablik seven em long bihain gut loa we bainism propeti na mani bilong pablik na ol mas mekim gut wok long ol pipel bai kisim gupela sevis wantaim mani na propeti we gavman putim long nem bilong ol pipel long han bilong pablik seven.

Mista Sai'i tok sapos ol pablik seven mekim gut wok bilong ol na i no asua bai lukim ol pipel bilong dispela kantri bai kisim gupela sevis tru na laip bilong ol bai senis.

Mista Sai'i i no tok pablik seven i asus tasol em tokim ol pablik seven sanpela rot bilong mekim gut wok aninit long loa we ol save pinis long duti pepa bilong ol.


Mista Sai'i tok pablik seven em, ol i no politisen na mas noken go insait long politiks na miksim wantaim wok bilong ol. Em tok wok bilong ol long karimautim plen na direksen bilong gavman.

Mista Sai'i tokim ol gre-dusen lain long go wok long taim, lukautim ol pablik propeti na mani we gut stap aninit long lukaut bilong ol.

Long wankain taim Deputi Sekretari bilong Operesens, Steven Rambe, i tok bikipela tenkyu long husat pinisim trening na tok namba wan lukluk bilong ol long olgeta de bilong wok em long mekim gut wok long kirapim kantri na lukim sevis go long stretim sindaun bilong ol pipel.



Ol pablik seven husat pinisim wan wik kos long PNGIPA wantaim tupela trena na Ekting sekretari bilong DIRD Paul Sai'i. POTO: Samson Kendemen, Publik Rilesen Opisa



Yumi Stori long PNG LNG

with Peter Graham, Managing Director, Esso Highlands Limited

Papua Niugini em i wanpela naispela na spesel ples stretlong graun. Em i wanpela kantri we i gat kalsa bilong en yet na ol pipel tu, i save pas klostu long envairomen bilong ol. Astingting bilong mipela em long PNG LNG Projek i operet long kain pasin we i lukautim gut envairomen taim em i kamapim wokmani bilong kantri.

Wanpela bikipela hap mipela i bihainim long lukautim envairomen em long pri-konstraksen sevei program bilong mipela. Bipo long mipela i statim konstraksen, bai i gat wok painimaut i kamap long wan wan sait na luksave long ol samting i stap long en, na kamapim plen bilong daunim ol bagarap inap kamap. Ol envairomen speselis bilong Projek i wok klostu wantaim ol ensinia na konstraksen tim long kamapim envairomen manesmen plen bilong ol. Long taim ol i mekim olsem, mipela i wok wantaim ol lokal komyuniti, lokal level gavman, Dipatmen bilong Envairomen, ol yunivesiti na non-gavman oge-naisesen long helpim mipela long kamapim wanpela stretpela pasin bilong lukautim ol samting i stap long bus, graun na wara.

Long wok patnasip, mipela i sapotim ol kain kain konsevesen program olsem Piku – dispela pik-nus trausel, em ol i save painim tasol long Omati River long Kikori. Mipela i helpim University of Canberra wantaim PNG Institute of Biological Resources long kamapim moa awenes namel long ol lokal pipel, na moa namel long ol skul pikinini, long lukautim gut ol kain samting olsem we i no planti tumas nau long hap bilong ol. Mipela i lukim bikipela intres bilong ol long taim ol i larim ol nupela pikinini pik-nus trausel i go bek long Omati River. Ol stori bilong ol long redio we i toktok long Piku i karim strongpela toksave long pasin bilong lukautim ol wara na enimal i save stap long wara.

Long Pot Mosbi ol nupela samting ol i soim long Nature Park ol i bin opim long mun Epril, i soim ol spesel enimal na ol diwai samting bilong PNG.

Helpim bilong mipela i bin go long program bilong kamapim moa sikau bilong diwai. Dispela em i wok bilong was na lukim olsem tupela kain sikau bilong diwai – Huon Tree Kangaroo i no gat planti i stap laip, na narapela ol i kolim Doria's tree Kangaroo. Wanpela bikipela samting dispela Nature Park i kamapim em program ol i kolim Education School Excursion we i helpim ol skul pikinini long kisim save na luksave long ol enimal na ol diwai samting bilong dispela kantri.

Baiodaivesiti Ofset Deliveri Plen bilong PNG LNG Projek em klostu i pinis nau. As bilong dispela plen em long daunim ol bagarap long taim ol konstraksen wok bilong Projek i kamap. Ol astingting bilong dispela Plen em long karamapim ol konsevesen ektiviti long lokal level, long strongim ol protektet eria, na long helpim ol nupela protektet eria developmen.

Long sapotim dispela Plen, mipela i sainim wanpela agrimen wantaim Mama Graun Conservation Trust Fund long sapotim konsevesen manesmen trening. Insait long foapela yia, Projek bai givim mani long Mama Graun long sapotim dispela "Enhancing Conservation Capacity Program" em ol lain bilong University of Papua New Guinea bai go pas long en. Dispela program bai givim trening long ol Papua Niugini long rot bilong lukautim ol lain kain kain samting bilong bus, graun na wara long Papua Niugini.

Long dispela inisitiv, mipela i tingting long kamapim ol savelain insait long ol lokal institusen long kamapim wanpela grup bilong ol speselis husat bai helpim long lukautim ol enimal na diwai samting bilong PNG. Dispela inisitiv i gat tripela hap – wanpela konsevesen manesmen kos, ol skolasip na givim wok long ol pipel.

Long sait bilong envairomen, mipela i laik lukautim tumora, tude.

Gutpela de.

**BEYOND BOUNDARIES
SUNDAY, 6PM - 6.30PM**

Topic of the week:

Police Brutality in Papua New Guinea



FM100

PNG's Information & Music Leader

Text 1610

ALOTAU 107.1	BUKA 100.8	KARKAR 100.5	KIUNGA 100.3	LORENGAU 100.3	MT. DIMODIMO 107.1	NAMATANAI 100.3	RABAU 100.8	TINPUTZ 100.8
AMBUNTI 100.8	DARU 100.5	KANDRIAN 100.1	KUTUBU 100.2	MADANG 100.8	MT. HAGEN 100.3	NCD 100.3	RAMU 100.3	TOLUKUMA 100.1
ANGORAM 100.8	DREIKIRKIER 100.8	KEREMA 100.8	LAE 100.5	MAPRIK 100.8	MT. HOREATO 107.5	NUKU 100.8	TABUBIL 100.3	WATERHOLES 107.1
ARAWA 100.3	FINSCHHAFEN 100.4	KIKORI 100.5	IAGIFU 100.2	MARKHAM 100.5	MT. KAINGUMA 107.1	PALMALMAL 100.6	TARI 100.5	WAU/BULOLO 100.8
BOGIA 100.5	GOROKA 100.2	KIMBE 100.3	LIHIR 100.3	MT. BOREGORO 107.7	MT. TURU 100.8	POPONDETTA 100.5	TELEFOMIN 100.3	WEWAK 100.8

Aipinapa redi long holim intanesenel enti drag de

OL PLES lain na ol kaunsel ov sif long Aipinapa, Not Mekeo, Sentral Provins, i rere tru na long kamapim intenesenel De bilong daunim pasin bilong yusim drag na spak brus (International Day Against Drug Abuse and illicit drug trafficking).

Dairekta Jeneral bilong Nesenel Nakotiks Buro (NNB), Yunaitet Nesen i makim de Jun 26 long luk-save long dispela de na Nesenel Narkotik Buro (NNB) bai selebretim dispela de

long Aipinapa viles.

John Mapus i tok, “Wok bilong rausim ol drag nogut na spak brus em i bilong olgeta lain. Yumi olgeta mas i go pas long ol komyuniti bilong yumi long skulim na lainim ol yampela lain bilong yumi long noken kisim ol drag nogut. Ol yampela yut i mas go pas long tok nogat long kisim drag.”

Wankain long ol arapela hap bilong wol na PNG, pasin bilong yusim nating ol drag na spak brus na salim

i go i kam i save bagarapim sindaun na developmen long olgeta 13-pela ples long 4 pela kaunsel wod long Mekeo.

Ol Lokol Kaunsel ov Sif i bin tokaut pinis olsem i gat ol lain i save planim na salim spak brus long Mekeo, na i save mekim hat tumas long lokol gavman na ol arapela gavman atoriti long wok gut wantaim ol komyuniti.

“Mipela rere long kamapim intenesenel De

hia long Aipinapa bikos mipela i laikim ol yut na ol pipel long hia, long save long ol bagarap i save kamap long taim ol i kisim drag na i no nap long lusim isi. Mipela laik rausim olgeta Mariuana long Mekeo na larim ples bilong mipela bai i stap gut na wantaim bel isi, na mipela olgeta mas putim han long kamapim developmen long PNG,” Siaman bilong Mekeo Kaunsel ov Sif, Kaunsela Anthony Auchila i tok.

T.H.E Pati sanapim kendidet long Angoram bai ILeksen

T.H.E Pati bilong Tresari minister Don Polye i sanapim wanpela kendidet long Angoram Bai eleksen long resisi long sis we leit Ludwig Schulze i lusim long dispela yaia.

Minsta Polye tokaut olsem em i sanapim Moses Gawi Sakurai long las wik Fraidelong ples Marienberg long Is Sepik long resis long Angoram Open.

T.H.E Pati em bikipela kolisin pati long gavman bilong O’Neill/ Dion.

Dispela em kisim go antap namba bilong kendidet resis long Angoram bai eleksen long 19. Amgoram bai eleksen i kamap bihain long leit Ludwig Schulze i dai long sik.

Mista Gawi Sakurai bin kamap namba 6 ples long las 2012 eleksen long Angoram open.

Mista Sakurai to k m



POTO: T.H.E Pati lida Don Polye na kendidet bilong em Moses Gawi Sakurai ol eskotim tupelo go long grensten long Marienberg LLG.

sanap long givim sevis go long ol pipel long ples we ol i no kisim besik sevis long planti yaia.

Minsta Polye tokim ol pipel long Angoram long sapotim kendidet bilong em

bikos em tok em bin sapotim Sir Michael Somare long winim sia bilong praim minister tupelo taim na Polye bin kamap deputi praim minister long dispela taim.

Minsta Polye tokim ol pipel olsem sapos ol givim namba wan vot long Mista Sakurai, namba tu vot ol mas givim ol kendidet stap long kolisin gavman bilong O’Neill.

Olgeta provins bai gat rihabilitesen senta ...Kirapim sapot grup

I GAT strongpela sapot na tingting long kirapim bek “rihabilitesen program” long helpim ol yangpela pikinini i gat sik long tingting i kamap orait na go bek long ol famili, komyuniti na sosaiti na go bek long nomol laip.

Long wankain taim, i gat strongpela sapot long plen i stap insait long plen bilong Mental Helt Dairektoret (MHD) olsem olgeta 20-pela provins insait long PNG bai gat ol wan wan “rihabilitesen” senta we ol lain i gat ol wari, hevi na sik long tingting i ken go kisim marasin na ol narapela helpim na sapot long en.

Ol dispela samting i bin kamap long ples klia insait long wanpela bung aste we ol sinia opisa bilong Medikel Stendet, Opis bilong Teknikel Edvaisa long Sospel Senis na Mental Helt wantaim Helt Dipatmen (SC&MH) i bin bung wantaim olsampela ol papamama long painim rot we ol i

ken wok bung wantaim na helpim ol pikinini bilong ol i gat sik long tingting.

Teknikel Edvaisa na Konsalten Saikaiaitrik, Dokta Uma Ambi, na ol Mental Helt opis i bin go pas dispela bung i bin kamap long Holiday Inn.

Dokta Ambi na ol narapela opisa husat i wokim ol prisentesen i bin tok taim “Rihabilitesen Senta” i bin stap (insait long Opis bilong Haia Edukesen long Mosbi), em bin ron gut na helpim planti pikinini na yangpela pipel i gat sik long tingting long kamap orait, go bek long nomol sosaiti na kisim wok long helpim ol yet na ol famili bilong ol.

Tasol bikos long sot long mani na politiks insait long dipatmen yet, ol bin pasin dispela wanpela rihabilitesen senta long Mosbi.

“Yumi gat salens nau long kirapim bek senta na tu, famili sapot grup.

“Sik long tingting em i wan-

pela sik we yumi olgeta i save gat long wan wan level bikos yumi save bungim sampela hevi insait long laip bilong yumi.

“Tasol em i save go nogut taim man o meri i mekim ol samting i abrusim mak bilong nomol level.

“Olsem na taim man o meri i kisim sik long tingting, em i no moa soselais o gat ol poroman, em i lusim sampela ol skil o save.

“Taim rihabilitesen senta i stap, em bin helpim planti siklain long kamap orait hariap.

“Tasol senta i bin pas long 2009 na i stap lok inap nau.

“Bikpela samting yumi laik mekim nau em long opim bek dispela senta na program na wokim plen long helpim ol pikinini bilong yumi,” Dokta Ambi i tok.

Maski ol kain hevi na politiks i kamap, Dokta Ambi i gat bikpela lewa na laik long helpim eria bilong Mental Helt

Drag na alkohol bikipela as long sik bilong tingting

Veronica Hatutasi i raitim

LONG 10-pela pipel i gat sik long tingting, 8-pela long ol em ol i kisim drag na alkohol long kamap sik, Saikaiaitrik dokta na bosmeri bilong Sosel Sen na Mental Helt Sevis, Dokta Uma Ambi, i tok.

Ol narapela as we ol pikinini bilong yumi i wok long kisim sik long tingting em long hevi long famili na “peer” presa o bihainim ol poroman.

Dokta Ambi i tok krismas bilong planti ol lain i kisim sik long tingting i stap namel long 12 na abrusim 20 yias.

Em i tok long tude, ol pikinini man na meri wantaim i bungim dispela sik, tasol mak bilong ol pikinini man i antap moa.

Laloki Saikaiaitrik Haus sik em wanpela bikipela haus sik tasol bilong lukautim ol pipel i gat sik long tingting na tude, em i gat 80 yangpela sik manmeri long em.

Mak bilong ol pikinin i meri



Dokta Uma Ambi

i stap long Laloki Haus sik inap long 6-pela taim ol narapela em ol pikinini man.

Planti ol siklain em ol skul pikinini husat i bungim hevi long miks bilong kisim mariwana, dring, ol sosel hevi olsem peer presa na hevi long famili.

Dokta Ambi i tok long dispela taim, ol i wok long stre-tim na mekim gut Laloki Haus sik long givim gutpela sevis long ol siklain .

Dokta Tapo i nupela ekting edukesen sekreteri

EDUKESEN Dipatmen i gat nupela ekting sekreteri.

Man ya em Dokta Michael Tapo husat i kisim ples bilong man i bin ekting long posisen long 9-pela mun, Luke Taita.

Mista Taita i bin ekting taim ol bin rausim pastaim Edukesen Sekreteri las yia, Dokta Musawe Sinebare.

Mista Taita i no bin aplai long ekting posisen bikos em i tingting long ritaia.

Tasol long nau, Mista Taita i go long olupela wok bilong em olsem Deputi Sekreteri Polisi na Koporet Sevis.

Taim Ekting Edukesen Minista, James Marape, i tok amamas long Dokta Tapo i kisim nupela ekting sekreteri posisen, em bin tok Nesenel Eksekutyut Kaunsel (NEC) i makim em (Dokta Tapo) long go hetim sampela polisi daireksen long ol bikipela polisi, ol straksa na kurikulum we O’Neill na Dion Gavman i laikim bai kamap hariap.

Minista Marape i tok ol bikipela polisi daireksen we Dokta Tapo i mas mekim na pinisim hariap em long rausim Autkam Beis Edukesen (OBE), Fri Tusen Fi ripot, ol skul sevei, ol infrastraksa plen bilong edukesen na ol ristraksa bilong dipatmen.

Mista Marape i tok NEC it ok oraitim pinis ristraksa o senis bai kamap long Edukesen Dipatmen long kisim i go insait wantaim nogat senis, Nesenel Komisin bilong UNESCO.

Em i tok tu olsem long ol

yia i kam, bai Vokesenel na Teknikel Edukesen tren-ing o TVET bai kisim moa strongpela sapot long baset bilong em.

Minista Marape i bin askim strong ol top menesmen tim na ol sinia opisa long sapotim gut Dokta Tapo long nupela wok em i kisim long en na em i ken hariapim ol wok long go hetim ol polisi daireksen.

Mista Marape i mekim tok lukaut i go long ol sinia opisa bilong Edukesen Dipatmen n a tok sapos Dokta Tapo i feil o i no kari-maut ol bikipela wok insait long tupela mun i kam we ol i givim long en, ol bai rausim em na wanpela o tupela long ol sinia opisa husat i no wok wantaim long helpim Dokta Tapo.

Dokta Tapo i no nupela man long Edukesen Dipatmen, nogat. Em i wok wantaim dipatmen long 36 krismas.

Em bin tok tenkyu long gavman long makim em long kamap olsem ekting edukesen sekreteri na em i promis long go hetim kwik ol polisi nas daireksen bilong gavman.

Long wankain taim, Mista Taita i bin tok tenkyu i go long olgeta opisa bilong Edukesen Dipatmen long gutpela sapot ol bin givim em insait long laspela 9-pela mun em bin ekting edukesen sekreteri.

Em bin tok tenkyu tu i go long midia o ol niuslain long sapot bilong ol long developim edukesen taim ol i ripotim ol wok kamap long (edukesen) sekta.

O'Neill gavman i luk-luk long stretim LLG, distrik na provins

DEPUTI Prais Minister na minista bilong Inta -Gavman Rilesen Leo Dion i tok gavman i redi long helpim Lokel Level Gagman na provins long wok strong long givim sevis long ol pipe.

Deputi praim minister aste long wanpela miting bilong CIMC long Pot Mosbi i tok, sevis diliveri em bikpela lukluk bilong gavman na tok, long 2013 baset gavman givim K0.5 milian long wanwan LLG long kantri na tok provins na LLG tu kisim bikpela mani long baset na tok ol lida mas wok bung wantaim nesnel gavman long givim sevis long pipel long rurel ples.

Mista Dion i tok LLG wokman mas soim bikpela komitmen long wok bilong ol na yusim mani gut na mekim klinpela wok long lukim developmen i ken kamap long ples.

Minista bilong Inta -Gavman Relisen i tok ol ki lain long mekim karim kaikai sevis diliveri plan bilong gavman em provinsel na distrik administreta wantaim menesa bilong LLG. Em tok bikpela polisi bilong gavman nau em, 2013 em yia bilong deliveri o mekim wok olsem na long 2013 baset, 51% em gavman givim long provins, distrik na LLG long bikpela populesen bilong kantri bai kisim sevis.

Minista Dion i tok bikpela amamas long CIMC long kamapim dispela bung we het tokotk bilong miting em *Stretim Sevis bilong Distrik long PNG.*

Mista Dion tok dispela em stap long lain long polisi bilong gavman na tok em gutpela hap long praivet na pablik sekta na sios na ol developmen patna na gavman wokman long kam bung na bungim tingitng long kirapim developmen long kantri.

Minista Dion tok, wanem ol tokotk kamap long dispela miting na rekomendesen we CIMC putim wantaim bai gavman i givim tok orait long karimautim wok long kantri.

Moa long en, Mista Dion i tok, long Me 8, 2013, Nesenel Eksekutiv Kuan-sil o NEC bin tok orait o endosim 2012 CIMC Kaunsil na Developmen Forum rikomendesen. Na NEC bin go het na direktim gavman dipatmen na ol ejensi long lukluk long rikomensesen na kamapim polisi na karim autim wok.

Deputi praim minister Dion i tok minista bilong Nesenel Plening Charles Abel bai tebolim dispela ripot long floa bilong palamen.

Long wankain taim minister Dion i salensim olgeta provinsel na distrik administreta na LLG menesa long kamap wantaim gutpela plan we bai wok gut long mekim wok long komunyuti long ol pipel bai kisim gutpela sevis.

Mista Dion i tok helpim ol ples lain long stap insait long ol liklik bisnis tu em moa gutpela long developim laip bilong wanwan.

Dai long taim bilong kempen long LLG Presiden

LORENGAU Taun na Manus Ailan i lusim wanpela biknem lidaman long provins bilong ol bihain long em i go kempen long kamap olsem lod meya bilong Lorengau taun.

Memel Kehou Pohei i bilong liklik ples Buyang long haiwe bilong Manus tasol em kamap olsem liklik bisnis man long taun.

Mista Pohei i gat nem long Manus long kamapim ol spot insait long Provins, na tu, em i wanpela spot man bilong bipo na kisim nem bilong PNG long sait bilong soka.

Memel save resis long sampela Nesenel lileksen tasol em save kam namba tu olgeta taim bipo long Papua Niugini i senis long LPV sis-

tem.

Dispela yia, ol yangpela manmeri long Lorengau taun i laikim em long kamap olsem lod meya na nominetim em long resis long dispela 2013 LLG lileksen.

Memel i dai bihain long em i kisim hat atek taim em sanap na toktok long ol manmeri long Wod Wan long Lorengau taun, taim ol kisim em go long haus sik ol painim aut olsem em dai pinis.

Long Fonde dispela wik ol kisim em go long liklik ples bilong em long Buyang na ol planim em.

Memel i lusim meri bilong em wantaim ol pikinini.

Kisim pepa long stop Drag

Nicky Bernard i raitim

MOA long 110 manmeri long Mekeo kisim skul na lainim we bilong stop drag long komyuniti bilong ol insait long liklik ples bilong ol.

Ol wok manmeri bilong Nesenel Nakotiks Buro bin go long Mekeo na mekim skul bilong stop dispela ol smok nogut we save

bagarapim komyuniti bilong ol.

Dispela skul i pulim planti long ol yangpela yut manmeri long go kisim save long we bilong ban-isim ol yet na tu givim skul go bek long ol famili long smok nogut i ken bagarapim bodi bilong ol.

Long dispela Trinde Dairekta Jeneral bilong Nesenel Nakotiks Buro John Mapua bin go long Mekeo na givim pepa bilong ol

dispela 110 yut na komyuniti leda olsem ol pinis skul bilong ol.

Long dispela de tu Nesenel Nakotiks Biuro bin makim dispela de olsem de bilong tok nogat long Drag na salim go kam.

Plantu bilong ol yut nau long Mekeo i save long wanem kain sik dispela smok nogut (mari-wana) save bagarapim bodi bilong man.



Sampela bilong ol yut husat i kisim skul na ol lusim ol smok nogut long han bilong ol polis. *Poto Nicky Bernard.*

AGRICULTURE TRACTORS



PORT MORESBY: 323 5572 | LAE: 472 6324 | KOKOPO: 982 8748
machinery@agmark.com.pg

AGMARK
MACHINERY

NASFUND FM100 TALKBACK SHOW

MONDAY - FRIDAY, 9AM TO 12PM

Participate and be heard on an open forum on National Radio



Studio: 323 3777 or 323 3999

ALITALI	107.1	KUSA	106.8	KARAKA	100.5	KUNDA	100.3	LORENGAU	106.3	MT. DINDOMO	107.1	NAMATANA	100.3	KAMAU	100.8	TIPUTU	102.8
AMBUITI	109.8	DARU	100.8	KANDAM	100.1	KUTUBU	100.1	MAKANG	106.3	MT. HADEH	108.8	MOU	100.3	KAMU	100.8	TOLUNUA	100.1
ANGORAM	100.8	DEIRHUBEN	100.8	KEREMA	100.8	KAI	100.8	MAPIH	100.8	MT. HONGATOA	107.8	NUKU	100.8	TANJIL	100.8	WATERHOLE	107.1
ARAWA	100.1	FINSCHAFEN	100.1	KUHON	100.8	IAGPU	100.3	MARIHAM	100.5	MT. KAHGUMA	107.1	PALMALMAL	100.8	TARI	100.8	WANDULU	100.8
BODIA	100.1	GORDANA	100.3	KINSE	100.3	LINH	100.3	MT. DOREGORD	107.7	MT. TURU	100.8	POPOHSETTA	100.8	TELEPOH	100.8	WEWAK	100.8

Ol kalabusman bilong Bihute i graduat

Sape Metta i raitim

RID na rait o litresi em wampela samting we planti lain man-meri long PNG i no save long en, long wanem, ol i no bin go long skul long lainim na kisim save long rid na rait.

Na dispela pasin em i no stop – em i go het yet olsem sampela Non Gavman Ogenaisesen (NGO) em Mercy Works Sisters na PNG Baibel Sosaiti i painimaut.

Na long Goroka na Isten Hailans, planti ol man-meri i stap husat i gat bikpela laik tru long lainim pasin bilong rid na rait, tasol husat bai lainim ol mekim olsem?

Dispela tingting bilong lainim long rid na rait tu i bin kamap long kalabus lainman-meri long Bihute banis kalabus ausait long Goroka.

Mekim olsem na long sampela yia i go pinis, litresi progrem i bin kamap long dispela banis, tasol i luk olsem i no gat ol fans long ranim dispela progren, so em i stop.

Tasol ol kalabus lain i no stop, long wanem, ol i luksave olsem dispela progrem bai i ken helpim ol long taim ol istap long kalabu banis na sevim taim bilong ol, na tu long taim ol i pinisim taim bilong ol na kamaut, ol i ken yusim dispela save ol i kisim long helpim na developim hiumen risos long wanwan komyuniti bilong ol.

Na ol kalabus lain long Bihute long liklik wei i statim litresi skul bilong ol. Ol yusim ol liklik stik na ston na ol arapela samting we ol i ting ol bai i ken helpim ol, ol i yusim.

Taim ol i mekim olsem na Mercy Works Sisters long Goroka i luksave long dispela bikpeal nid em ol i laikim long en, na em i stat long bringim ol meteriels (Materials) olsem ol buk, pen, rula na ol arapela samting bilong skul i go na givim ol kalabus lain husat i kamap olsem ol litresi sumatin long yusim.

“Mipela i luksave long olsem planti long ol i no save long rid na rait, olsem na taim ol i soim bikpela



Dairekta bilong Mercy Works Sisters long Goroka, Sista Maryanne Kolkia i presentim setifiket na pidgin Baibel i go long litresi skul trena bilong ol kalabusman Paul Simon long taim bilong namba wan litresi skul greduesen long Bihute banis kalabus ausait tasol long Goroka Isten Hailans long wik i go pinis.



Wampela kalabusman sumatin i kisim setifiket na pidgin Baibel em Dairekta bilong Mercy Works Sisters long Goroka, Sista Maryanne Kolkia i givim, na lukluk i stap em PNG Baibel Society representative, Sam Kenny na Rose Patrick.

Ol Poto: Sape Metta

laik tru long lainim na kisim skul long rid na rait, mipela i go long wei bilong mipela long helpim ol,” Mercy Works Sisters Dairekta, Sista Maryanne Kolkia i tok.

Em i tok ogenaisesen bilong em i save helpim long lainim na trenim planti ol turangu lain. Na ol kalabus lain em sampela long ol lain we Mercy Works Sisters i save amamas long helpim.

Sista Maryanne i tok em i amamas long lukim olsem 17-pela kalabus man i bin wok hat long las yia yet i kam, na bihain long ol i lainim na kisim gut skul bilong rid na rait – ol i greduet na kisim setifiket. Na dispela em i bikpela samting, long wanem, ol setifiket ol i kisim bai i ken helpim ol tu long helpim arapela husat i no save long rid na rait, insait long banis na ausait long banis tu.

Em i tok ogenaisesen bilong em i amamas tasol long go het long helpim, long wanem taitol bilong ogenaisesen bilong em i tok pinis ‘Mercy’ o sore.

Sista Maryanne i tok amamas tu long Koreksenal Sevis Institusen (CIS) long Bihute long wanbel na larim dispela progrem long kamap long banis kalabus na PNG Baibel Sosaeti husat i helpim tu long givim aut ol tok pisin Baibel long taim bilong greduesen long Mande wik i go pinis.

Kalabuman na litresi trena Paul Simon long taim bilong greduesen i tok planti ol kalabus lain i no save rid na rait.

Olsem na taim ol i kamapim dispela letresi skul, planti lain i kamap na kisim trenim.

“Olsem trena mi amamas tru long luksave olsem interes em i stap na planti ol wankalabus lain bilong mi i gat bikpela laik tru long dispela progrem.

Mi luksave tu olsem planti gutpela developmen tu em i kamap long tingting bilong ol man, na pasin bilong rid na rait tasol i kamapim dispela ol senis,” Simon i tok.

Aipinapa redi long holim intanesenel enti drag de

OL PLES lain na ol kaunsel ov sif long Aipinapa, Not Mekeo, Sentral Provins i redi tru na long kamapim intenesenel De bilong daunim pasin bilong yusim drag na spak brus (International Day Against Drug Abuse and illicit drug trafficking).

Dairekta Jeneral bilong NNB, Yunaitet Nesen i makim de Jun 26 long luksave long dispela de na Nesenel Narkotik Buro (NNB) bai selebretim dispela de long Aipinapa viles.

John Mapus i tok, “Wok bilong rausim ol drag nogut na spak brus em i bilong olgeta lain. Yumi olgeta mas i go pas long ol

komyuniti na sosait bilong yumi long skulim na lainim ol yampela lain bilong yumi long noken kisim ol drag nogut. Ol yampela yut i mas go pas long tok nogat long kisim drag.”

Wankain long ol arapela hap bilong wol na PNG, pasin bilong yusim nating ol drag na spak brus na salim i go i kam i save bagarapim sindaun na developmen long olgeta 13 pela ples long 4 pela kaunsel wot long Mekeo.

Ol Lokol Kaunsel ov Sif i bin tokaut pinis olsem i gat ol lain i save planim na salim spak brus long Mekeo, na i save mekim hat tumas

long lokol gavman na ol arapela gavman atoriti long wok gut wantaim ol komyuniti.

“Mipela rere long kamapim intenesenel De hia long Aipinapa bikos mipela i laikim ol yut na ol pipel long hia, long save long ol bagarap i save kamap long taim ol i kisim drag na i no nap long lusim isi. Mipela laik rausim olgeta Mariuana long Mekeo na larim ples bilong mipela bai i stap gut na wantaim bel isi, na mipela olgeta mas putim han long kamapim developmen long PNG,” Siaman bilong Mekeo Kaunsel ov Sif, Kaunsela Anthony Auchila i tok.

Ol turangu yut na meri i kisim moa sevis

Moa yangpela man, pikinini nogat papamama na ol lain i save ronawe long pait na bagarap insait long famili bilong ol long Pot Mosbi na Lae bai kisim bikpela helpim bilong senisim laip bilong ol wantaim K1 milan gren i kam long Australia i go long Siti Misin PNG.

Siti Misin PNG i kisim gren aninit long StrongimPipol Strongim Nesen program, em i wok bilong patnasip namel long Australia na Papua Niugini Gavman wantaim fan i kam long AusAID.

Siti Misin PNG Dairekta, Pastor Ron Brown i tok dispela fan bai kamapim bikpela wok long ministri bilong Siti Misin PNG.

“Ol man na ol risos bai kamapim strongpela as bilong mipela mekim wok i go long 20 yia moa,” Pasto Brown i tok.

“Dispela gren mani bai helpim mipela long mekim moa gutpela trenim bilong ol lain i wok insait long Siti Misin Program.”

Siti Misin PNG i save givim laip skil trenim bilong ol yangpela man

long helpim ol bai ol i noken wokim pasin raskol long strit, em i save helpim ol mama na pikinini painim hevi long marit na famili, na i save helpim ol pikinini mama na papa i dai pinis long sik AIDs.

Dispela mani gren bai helpim misin long kisim moa ol save lain bilong lainim ol yangpela man na helpim ol mama na pikinini, na tu, long wokim moa haus bilong ol wok manmeri na ol klasrum bilong trenim senta.

Em bai helpim long kamapim gut we bilong lukautim ol fainens na long monitaim na ivaluetim o glasim ol program.

Man i go pas long Australia Eid Progrem long PNG, Stuart Schaefer, i tok taim yumi helpim ol lain i nidim helpim, em bai mekim komyuniti bilong yumi i stap gut na nogat hevi.

“Siti Misin PNG i save kisim ol yangpela man long rot na givim ol save long kamapim gutpela laip long bihain na ol i stop long mekim pasin bikhet na kamap gutpela

memba bilong komyuniti bilong ol,” Mista Schaefer i tok.

“Ol pikinini na ol meri husat nap long slip nating long rot bikos long ol papa i bagarapim ol, nau i gat ples hait na ples bilong kisim helpim i stap long Siti Misin. Taim yumi helpim ol turangu lain long kamap strong, yu strongim nesen. Em i mining tru bilong SPSN progrem” em i tok moa.

Wantaim SPSN progrem, Australia na PNG gavman i save givim ol gren mani i go long ol ogenaisesen i save soim bikpela laik long kamapim gut helt na edukesen long komyuniti, gutpela sapot bilong ol mama na liklik pikinini na long helpim ol lain i painim hevi long sik HIV/AIDS, helpim man na meri long wok bung wantaim, na long helpim tu ol disebel.

Ol i mekim wok bilong daunim pasin bilong paitim na bagarapim meri na kamapim moa wok bilong olgeta pipel i mas wok bung wantaim ol lain i disebel tu.

Meri Buin laikim Tabubil

Veronica Hatutasi i raitim

MERI Wantok i bin raun i go long Tabubil, em maining taun antap long Star Maunten insait long Westen provins, na em i bungim sampela wantok bilong em long longwe hap olsem.

Wanpela long ol em Cathy Putubu, mama bilong 7-pela pikinini. Tripela ol pikinini em i bin karim ol long hap.

Cathy i bilong Buin, Saut Bogenvil long Otonomes Rijen bilong Bogenvil (AROB).

Em i maritim Joe Putubu, wantok tu bilong em husat i wok long Ok Tedi Maining Limitet (OTML) olsem wanpela meturalojis long leboretori bilong main Mil.

Mista Putubu i bin go wok pastaim long hap, na tupela yia bihain, Cathy na famili i bihainim em long yia 1997. Na ol i stap olgeta long hap, na ol pikinini i skul na tupela i kisim wok pinis.

Cathy i tok wanem long ples we em i stap long em long 16 krismas nau,

"Mi gat 7-pela pikinini. Sik-



REDI LONG GO LONG TAUN: Meri Wantok i bungim Cathy Putubu taim em i go long wokim soping na maket long taun. **Poto: Veronica Hatutasi**

spela em ol pikinini meri, na laspela tasol em i man. Namba wan pikinini meri i bin stap long Gret 4 taim mipela i kam long Tabubil, tasol em pinisim skul pinis na em i wok long Tabubil

Enjiniering stap.

"Namba tu pikinini meri i ranim bisnis bilong em long ples, na dispela em long Buin yet, AROB. Namba tri i skul long Yunivesiti long Is Nu

Briten taim namba 4 long Di-vain Wod Yunivesiti (DWU). Tripela i stap long Tabubil Intanesenel skul yet.

"Mipela i laikim stret Tabubil. Em i gutpela ples. Olgeta samting mipela i laikim i stap, gutpela skul we ol pikinini bilong mipela i skul long en, haus sik, gutpela sekyuriti na sefti we mipela i wokabaut fri na nogat pretpasin na gutpela ples long ol pikinini i groa long en," Cathy i tok.

Em i tok tru, sampela prais bilong sampela samting long maket na stoa i antap moa, laip i olsem tasol long olgeta hap na wanwan man na famili i glasim na skelim ol samting na wokim disisen long ol samting long laip na sindaun bilong ol.

Cathy i tok em i gat planti poroman na famili bai stap long Tabubil inap long taim man bilong em i ting em inap long wok.

Tasol long nau, Cathy na famili i amamas stap long kol ples, Tabubil we klaimet i nais na kol, olsem tasol long Panguna.



Yut, Meri na Famili

Pastor Barbara Lunge

Amamas long bel em i olsem marasin

YU gat bel pen na wari? Yu gat hai blat presa bikos long hevi wok yu mekim o bikipela tingting yu gat? O yu wanpela sumatin long skul o kolis na yu no save putim skul wok nam-bawan? Tingting bilong yu i paul? O yu kisim sik i nogat marasin bilong em? O yu gat hevi long marit bilong yu?

Planti pipel i dai taim ol i stap yangpela yet, na ol i no save pinisim wok God i makim long ol i mekim taim ol i kamap long dispela graun. Sampela i no lukim ol tumbuna bilong ol na ol arapela i lusim kampani o ogenaísesen nating na i no putim man long kisim ples bilong ol.

Tingting na pasin nogut em i sampela we, we i save kamapim sik na bagarap. Tasol yu ken kamap win manmeri sapos yu mekim rait disisen long tude. Olgeta bekim bilong ol hevi yu gat long laip i stap tasol long buk Baibel we i save givim tok i gat laip.

Hia em sampela tok tru insait long buk baibel we i tokaut long ol blesing bilong ol gutpela prut ol pikinini man na pikinini meri bilong God i ken gat:

"Amamas long bel em i gutpela marasin", Gutpela Sindaun 17:22a

"Yu soim mi long rot bilong laip. Long ai bilong yu, mi painim bikipela amamas. Long han sut bilong yu, i gat taim bilong pilim gut oltaim, oltaim." Buk Song 16:11

"Tasol prut bilong Spirit em i pasin bilong laikim tru ol narapela, pasin bilong amamas, pasin bilong i stap bel isi, pasin bilong i no bel hat kwik, na pasin bilong helpim ol man na mekim gutpela pasin long ol, na pasin bilong wokabaut stret oltaim na pasin bilong i stap isi na pasin bilong daunim olupela bel. I no gat wanpela lo i tambuim ol dispela kain pasin. Olgeta manmeri bilong lain bilong Krai i kisim olupela bel wantaim ol laik na mangal nogut bilong en, na ol i nilim pinis long diwai kros na em i dai pinis. Galesia 5: 22-24,

Oltaim yupela i mas amamas long Bikipela! Mi tok gen, yupela i amamas. Yupela i mas isi isi long olgeta man na larim ol i lukim dispela gutpela pasin bilong gutpela. Tingim. klostu nau Bikipela bai i kamap.

Yupela i no ken wari long wanpela samting. Nogat. Oltaim yupela i mas tokim God long olgeta hevi bilong yupela. Yupela i mas prea long God na tok tenkyu long em, na askim em long helpim yupela. Bel isi God i save givim yumi em i gutpela samting tru, na yumi man i no inap tru long save long as bilong en.

Orait God bai i mekim yupela i stap bel isi tru, na long dispela pasin yupela bai i pas gut wantaim Krai Jisas, na bel na tingting bilong yupela bai i stap gut tru. Filipai 4:4-7

"Kingdom bilong God i no bilong kaikai na dring, nogat, em bilong stretpela pasin, pasin bilong stap bel isi, na pasin bilong bel amamas insait long Holi Spirit." Rom 14:17.

"Ol tok promis bilong yu i swit long maus bilong mi, i winim hani long maus bilong mi!" Buk Song 119:103

Tok bilong God i tok amamas long bel em i olsem marasin. Olsem na bel bilong yumi i mas wanbel tru wantaim dispela gutpela tok promis na mipela i nap long stap longpela taim long dispela graun, kamap yangpela gen na kisim gutpela helt.

Em i tok tu olsem, yu mas traim kaikai na lukim, tok bilong God em i gutpela moa, i swit olsem hani.

Sapos yu laik save moa; toktok wantaim wokmeri bilong Bikipela, Barbara Lunge, Rivers of Grace intenesenal Ministri. P.O. Box 3063. Boroko. NCD. Papua New Guinea. B Mob 67331426 OR 71075829 DG.

Nupela helt senta bai helpim gut ol mama na pikinini

NUPELA helt senta long Nomad eria insait long Westen Provins bai sevim planti mama i save dai taim ol i karim pikinini, na planti pikinini long 5-pela krismas i go daun i save dai taim ol i no groa yet.

Long las wik, moa long 1,000 pipel bilong Bedamauni eria long Nomad Distrik i bin gat gutpela as long selebret long wanem, ol i opim nupela Mogulu Helt senta is tap long Mogulu Misin stesen.

Skelim wantaim wol na Esia Pasifik rijen, PNG i wanpela long ol kantri we i gat bikipela mak long ol bel mama na ol liklik pikinini long 5-pela krismas i go daun i save dai taim ol i no groa yet.

Long dispela taim, Nesenel Helt Dipatmen i wok hat tru wantaim ol han bilong Yunaitet Nesens long kantri na gavman long daunim mak long PNG we long dispela tai mi sanap olsem long olgeta 100,000 mama i karim, 700 i save dai.

Kelly Kewa i makim Not Flai helt Sevis Developmen Pro-grem i tok dai long bikipela mak bilong ol bel mama na pikinini long PNG em i wanpela bikipela wari na dispela nupela helt senta bai helpim long daunim mak na sevim moa mama na pikinini.

PNG Sastenebol Developmen Pro-grem (PNGSDP) i bin givim K100,000 long wokim nupela helt senta.

Sif Eksekutiv Opisa bilong PNGSDP, David Sode, i tokhelpim bilong ogenaísesen bilong em wantaim dispela manimak i soim olsem kampani i laik sapotim humen na



NUPELA BILDING: Long taim bilong opening bilong nupela Mogulu Helt senta. **Poto: PNGSDP Midia**

sosel developmen aninit long gutpela helt sevis.

Mista Sode i tok long Westen provins yet, PNGSDP i helpim long sanapim pinis 24-pela helt senta, 6-pela haus bilong ol dokta na 22 haus bilong ol nes.

Na em i tok ol bai helpim long sapotim na sanapim moa helt senta long provins.

Wanpela Evangelikel Sios bilong PNG misinari famili, em long Tom Hoey famili i bin statim dispela projek wantaim helpim bilong komyuniti na ol narapela dona ogenaísesen.

Taim Mista Sode i bin raun i go long Mogulu long opim nupela telekomyunikesen tawa bilong PNGSDO, em bin lukim wok we Hoey famili i mekim na em bin kisim tingting long oge-

naísesen bilong em long givim sapot wantaim mani.

Em i tok projek i kos K750,000 na olsem, PNGSDP i givim K100,000 kontribusen bilong em long pinisim dispela projek.

Pastaim, PNGSDP i bin helpim komyuniti long Mogulu wantaim K58,000 long baim somil na K198,000 long baim trakta na trela na em bin tok ekstra mani long helt senta projek i gutpela samting.

Misinari Hoey husat i mekim na kirapim projek i stap wantaim famili bilong em na wok olsem misinari long Mogulu namel long Bedamuni pipel long 45 krismas.

"Dispela em i gutpela nupela bilding na mi bilip olsem ol

pipel bilong Bedamuni, moa yet ol mama na pikinini, bai kisim gutpela helpim long plan ti yia i kam.

Nupela bilding i kisim ples bilong olupela wan ol i wokim planti yia i go pinis wantaim ol bus metiriel.

Nupela bilding i gat wok bilong ol siklain, wod bilong ol mama i karim, leboretori, famasi na toilet.

Em i gat sola pawa nap les long kisim renwara long en.

PNGSDP i gat 63.4 pesen sea long Ok Tedi Maining kampani, na e mi save yusim ol winmani bilong em long sapotim ol wok developmen long olgeta hap bilong PNG we i karamapim tu ol komyuniti beis projek.

Ol Daru-Kiunga Daiosis helt i kisim nupela masin long kukim pipia

OL KATOLIK Helt Sevis long Daru-Kiunga Daiosis i gat long em ol helt senta, bai nogat hevi nau long rausim ol pipia bilong ol bikos ol i gat ol nupela masin bilong kukim ol pipia.

Dispela i kamap wantaim helpim bilong PNG Sas-tenebol Developmen Progre (PNGSDP) na ATProjek Inc, em wanpela Non Gavman Ogenaisesen i save mekim ol kain teknoloji wok ilong helpim ol pipel i stap long ol ruel eria bilong kantri.

Samting olsem 21 Katolik Helt Senta long Daru-Kiunga Daiosis bai kisim ol insenereta o masin bilong kukim pipia long en.

Ol masin ya bai helpim ol helt senta long daunim hevi we planti haus sik, ol helt senta na etpos long dispela kantri i save bungim, na dispela em bilong rausim ol pipia we ol haus sik na helt senta i save kamapim wantaim ol samting ol dokta i save yusim long wok bilong ol long tritim ol sikman long en. Em ol i save kolim long "medikol weis" (medical waste).

Helt Menejeres bilong Daru-Kiunga Katolik Helt Sevis, Sister Anna Singinwa, i tok 20 insenereta i kamap pinis long Kiunga long stat bilong dispela mun na i wetim tasol ol lain bilong ATProjek long go na putim ol long ol wan wan



REDIM: Ol woklain i redim ol insenereta long salim i go long Westen Provins. **Poto: OTML Pablik Rile-sens**

helt senta.

"Planti haus sik na ol senta i nogat ol ples long tromoim ol pipia bilong ol marasin na mipela i bungim ol hevi long dispela long planti yia.

Ol dispela insenereta bai helpim gut mipela long rausim ol medikel pipia," Sister Anna i tok.

Sister Anna i tok tenkyu i go long PNGSDP long sapot em i save givim long lukim olsem helt stendet long Westen provins i gupela.

Ko Dairekta bilong ATProjek, Steve Layton, i tok ol dispela insenereta i no kos bikpela mani, tasol ol bai helpim long daunim hevi we ol

helt kea fasiliti olsem ol helt senta i no bikpela tumas i bin bungim long planti yia.

"Long 2002, wanpela wok painim we Wol Helt Ogenaisesen (WHO) i bin karimaut long 22 diveloping kantri i bin soim olsem planti haus sik, helt senta na ol narapeal helt fasiliti i no yusim stretpela rot long tromoim ol pipia bilong ol. Na mak i sanap namel long 18 na 64 pesen.

Mista Layton i tok mak long PNG i mas sanap long 75 pesen, tasol i nogat gupela rekot long nol sik pipel i kisim long ol medikel pipia we ol i no save tromoim gut.

Em i tok long lukluk raun i

go long ol liklik helt senta long dispela kantri, em i soim olsem ol i no save tingim ol sik pipel bai kisim long ol medikel pipia ol i no tromoim ol gut.

Ol insenereta i no kukim ol pipia, tasol ol pipia we ol i kukim em ol i save pondaun i go aninit long tripela mita hul i stap aninit long insenereta.

Ol PNG tredman o wokman i gat save na i wantaim ATProjek i wokim ol dispela insenereta.

PNGSDP i wok patna wantaim ATProjek long Goroka, Isten Hailans Provins na Katolik Helt Sevis long kamapim gut ol helt stendet long provins.

Ol Luteran tok gutbai na welkamim nupela helt siaman

Paulus Tali i raitim

WOK lidasip long kain kain rot em i no isipela.

Taim yu laik kamap lida, yu mas komitim yu yet na lusim famili, na givim taim bilong yu long wok yu laik

karim na bai yu lukim kaikai bilong wok i kamap.


Olsem nau gupela piksa em olpela siaman bilong Luteran Helt Sevis (LHS), Maiau Kaiok bilong Karkar Luteran Distrik.

Mista Maiau i sevim LHS long moa long 33 krismas na tu, mekim wok siaman bilong LHS we em i givim taim tru long wok bilong em.

Mista Kaiok em i wanpela isipela man i gat daun pasin na em wok olsem siaman aninit long 4-pela het bisop bilong Evanjelikel Luteraa Sios (ELC-PNG). Na nau, Reveran Giegere Wenge i mekim namba 5 man.

Long seremoni bilong hen ova tekova na putim nupela man long wok bilong em, Pasto Yasam Aiware taim em i autim tok bilong God i tok long dispela graun, i gat kainkain man i stap.

Wanpela em man bilong paitim bros na pairap planti, narapela i gat daun pasin na komitim em yet na givim em yet long karim wok na man i save tingim mani na kago.



GIVIM BLESING: Pasto Yasam Aiware i givim oda bilong instalesen long olpela LHC, Maiau Kaiok. **Poto: Paulus Tali**

Pasto Aiware i tok husat man i givim taim, kago na mani bilong em long wok bilong sios bai lukim moa blesing bilong Jisas.

Em i tok long dispela, yumi ken tingim olpela siaman, Mista Kaiok husat i soim tru mak na piksa bilong wok lida tru long wok bilong em tasol.

Na bai God i blesim em moa long wok em mekim inap 33 krismas.

Pasto Aiware u bin givim blesing i go long nupela siaman, Gewabing Nari husat i kisim ples bilong Mista Kaiok insait long spesel seremoni we i bin lukim ol bikman i kam long witnessim dispela hen ova tekova na instalesen seremoni

long het opis long Ampo olsem Hetbisop Reveran Giegere Wenge, long Hailans rijen, ol LHS wokman long Madang, Finsafen na Butaweng ol tu kamap long witnessim program bilong instelesen.

Nupela siaman em Mista Nari i bilong Kaiapit Seket insait long Yabim distrik.

Em wok 17-pela krismas inap bod bilong LHS na sios makim em.

Em i tok bai em i wok klostu wantaim ol LHS het na ol institusen bilong LHS.

"Mi yet mi i no medikal helt wokman, tasol long wok ekspirians bai mi givim taim long nupela wok mi kisim long en," Mista Nari i tok.

Long wainkain taim, Mista Nari i mekim gupela toktok lon g Mista Kaiok bilong stap olsem gupela wasman long karim wok lidasip na siaman posisen bilong LHS long longpela taim.

"Maski kain kain hevi we em bungim, tasol em i no surik. Em i skruim wok, maski taim nogut o gupela taim, em i stap long lukim olsem senis i mas kamap long LHS.


Mista Nari i tok "bai mi givim mi go long God, na yupela ol opisa bilong LHS i ken holim han na yumi surukim gen wok bilong Helt Sevis long kantri."

Taim Hetbisop, Reveran Wenge i tok amamas long olpela siaman long longpela wokabout bilong Helt Sevis na wok e mi mekim long bringim sevis i kam inap long mak nau, em bin tok God i save lukluk long man i daunim em yet na karim pen na hevi.

Em tok long dispela kaikai bilong wok kamap Mista Kaiok bai kisim blesing long en.

Long wainkain taim, Reveran Wenge i bin tok ol sios na gavman woklain i mas mekim gut wok na bai blesing bilong God i ken kapsait antap long ol.

Long makim Hailans rijen, Sekreteri na Pasto James Koi i bin autim bikpela tok tenkyu i go long Mista Kaiok long gupela wok em bin mekim long planti yia olsem siaman bilong LHS, na planti senis i kamap



Samurai

KLOSTU long bikpela Tokyo, wanpela bikpela siti long Japan, i gat wanpela Samurai i stap.

Em i kamap lapun pinis. Tasol em i gat strongpela laik yet long skulim ol yangpela long skul bilong Budha.

Long wanpela apinun, wanpela waria (warrior) o wanpela strongpela man bilong pait i kamap long dispela ples.

Planti man i save olsem dispela waria em i man nogut. Em i nogat rispek long ol lapun na narapela manmeri. Em i save soim antap pasin bilong em. Em i no bin lus long wanpela pait. Em i save winim olgeta pait.

Taim em i harim gupela nem bilong Samurai, em i kam na laik bagarapim nem bilong Samurai.

Sapos em inap long bagarapim nem bilong Samurai, em bai kisim bikpela namba na gupela nem namel long manmeri i stap wantaim Samurai.

Em i ting olsem, planti manmeri bai i no bilip long skul bilong lapun Samurai moa. Ol i bai lusim Samurai na bihainim em long kamap sumatin bilong em.

Taim sumatin i harim plen nogut bilong waria, olgeta i no laik dispela samting bai kamap. Ol i no laik waria bai bagarapim nem bilong Samurai long ai bilong planti manmeri.

Tasol Samurai i tokim sumatin bilong em long noken wari. Olgeta samting bai kamap orait.

Olgeta manmeri i bung pinis long stedium bilong Tokyo Siti long harim na lukim dispela yangpela waria i tok nogut na tok bilas long lapun Samurai.

Samurai na waria i stap namel long stedium na manmeri i raunim tupela.

Yangpela waria i stat long tok bilas, tok nogut long lapun Samurai.

Em i bikmaus long Samurai, spetim pes bilong em wantaim wara bilong maus bilong em.

Tasol Samurai i sindaun isi na i no bekim wanpela tok o i no pait bek long yangpela warior.

Pasin bilong Samurai olsem i mekim warior i kros moa moa yet.

Na em i kisim ston na tromoi long pes bilong Samurai, kisim stik na paitim baksait bilong lapun Samurai.

Em i no tok nogut long Samurai tasol. Em i tok nogut long tumbuna bilong Samurai tu.

Foapela aua i go pinis, yangpela waria i tok nogut, tok bilas na paitim lapun Samurai. Lapun Samurai i sindaun isi na harim tasol.

Taim san i go daun, yangpela waria i pilim tait pinis.

Em tok nogut planti pinis. Bihain em i lusim lapun Samurai na i go.

Olgeta sumatin bilong lapun Samurai i no amamas tru long lukim na harim yanpela waria i bin bagarapim nem bilong tisa bilong ol.

Olsem na ol i askim lapun Samurai; "Yu pilim olsem wanem? Olgeta tok nogut em i tromoim long yu! Bilong wanem yu no laik bekim wanpela tok? Bilong wanem yu no yusim bainat bilong yu long pait bek taim em i tromoi ston, o paitim yu wantaim stik? Maski yu bai lus, tasol yu inap long pait bek. Yu sindaun sarap na harim tasol ya, mekim mipela sumatin bilong yu i pilim sem nogut tru".

Long bekim askim bilong sumatin, lapun Samurai i putim wanpela askim long ol. "Sapos wanpela man o meri i givim presen long yu, na yu no laik kisim, dispela presen bai go we?"

"Dispela presen bai go long man/meri husat i laik givim long yu", wanpela sumatin i bekim.

Samurai i tok: "Wankain long dispela yangpela waria. Em i tok bilas na tok nogut long mi, paitim mi wantaim stik na stonim mi, tasol mi no kisim olget samting em i givim long em."

Olgeta tok bilas, tok nogut na kain kain samting em i mekim long mi, olgeta i go bek wantaim em.

Olsem na sapos manmeri i tok nogut o tok bilas, you mas sarap tasol na larim em o ol i go head. Olgeta tok nogut bilong em bai go long em.



TRENING: Ol trena bilong RHTU long taim bilong lonsing wantaim ol dami o giaman bebi.

Riprodaktiv Helt Trening Yunit i stap long intanet

OL helt woka na ol helt eduketa long eria bilong riprodaktiv helt insait long Papua Niugini nau i ken kisim ol toksave long ol tren- ing, we bilong givim marasin na ol arapela bikipela toktok long helpim wok bilong ol, long intanet tasol.

PNG Riprodaktiv Helt Trening Yunit (RHTU) lon- sim dispela websait long Fraide 7 Jun 2013 long lekta rum bilong ol Medikal Fekalti baksait long 3-Mail Pot Mosbi Jeneral Haus sik. Helt Dipatmen i bin kamapim dispela Riprodak- tiv Helt Trening Yunit.

Dispela websait em i wan- pela wok bilong Pablik- Praivet Patnasip program namel long NDoH, Australia Gavman Eid Ejensi (Aus- AID) na Oil Ses Helt Faun- desen.

Ol i wok long kamapim RHTU isi, isi long kamapim na yusim wanpela PNG tren- ing sistem bilong ripro- daktiv helt, long helpim ol lain i wok long helt long lainim moa save long praimer- i helt wok na ol helt eduketa (bipo long ol i pin- isim skul, taim ol i pinisim skul na lainim moa taim ol i wok i stap.)

I gat namba tu step i stap long bihain bai, RHTU i muv i go long wanpela rait- pela helt edukesen skul, na laspela hap bai lukim RHTU i sanap bilong em yet olsem wanpela nesenel tren- ing bodi long bungim Nesenel Dipatmen ov Helt na ol provins, na tu namel long ol kainkain level bilong tren- ing long bipo long sku, bihain long pinisim skul na in- sevis taim ol i go bek gen long kisim sampela moa save bi- long olgeta lain i save gat helt ke.

“RHTU i kamap bikos long nau nid i stap long gavman i mas hariap long putim ripro-

daktiv helt sevis long PNG i kam pas,” Dokta Miriam O’- Connor, Dairekta bilong RHTU i tok.

“NDoH i bin kamapim dis- pela yunit bilong wanem Minsterial Tas Fos long helt bilong ol mama, we em i luk- save olsem i gat klia nid bi- long olgeta taim mas trenim gen ol wokman meri long ol i stap wantaim raitpela na nupela save olgeta taim,” Dokta O’Connor i tok.

Em i tok wok kamap bi- long PNG Riprodaktive Helt i no gutpela tumas long ol mama i karim na ol nupela bebi i bon, olsem na ol i mas hariap long stretim ol helt sevis, tasol i gat planti hevi i stap long PNG na i save mekim hat long repodaktiv helt sevis i go aut long ol pipel. Em ol kain hevi olsem;

- namba bilong ol pikinini i bon i kamap bikipela hariap tumas namel long yia 2000 na 2011;

- planti helt senta i wok long kain, kain helt sistem, na planti bilon gol i stap wok isait long rurel nap les longwe stret

- Ol i lukim olsem ol ples bilong tren- ing nau i stap aninit long NDoH na ol skul bilong helt i sot long mitim nid bilong kamapim moa save long olgeta helt woka.

- Ol nid bilong PNG i wok long senis hariap, ol polisi, prosidia, stended na nesenel gaidlain. Planti helt wok i wok yet long givim marasin na kea wankain olsem tren- ing ol i bin kisim bipo yet.

We bilong dispela pro- gram em i bilong kamapim tupela wok bilong sevim laip bilong bel mama na ol bebi bilong ol, olsem ol i bin luk- save insait long PNG Min- sterel Tas Fos long Matenel Helt. Dispela em;

1. Kamapim wanpela klia- pela helt sevis long helpim

Femili Plening (FP) sevis long Papua Niugini lain husat i laik yusim,

2. Olgeta mama i mas karim long wanpela helt pos we helt woka i lukautim ol na taim i gat imejensi bai i gat helpim i stap klostu long ol meri husat i nidim or long salim ol hariap go long bikipela haus sik i stap klostu.

Dokta O’Connoer i tok RHTU Komiti i tok olsem ol tren- ing bai makim stret ol dispela;

Olgeta grup bilong helt woka olsem, komyuniti helt woka, nes, helt ekstensen opisa, midwaif na ol dokta;

Olgeta level bilong helt sistem olsem provinsel na rurel helt senta Riprodaktiv helt eduketa long pre- sevis na pos- besik tren- ing skul na tren- ing bilong ol klinikel trena long ol provins i kisim moa save long wok.

Pos besik trena na ol lain i greduet long skul i mas stap insait long riprodaktiv helt sevis provisen em; Mid- waif o nes i helpim mama long karim, speselis ob- steriks o dokta bilong mama, eksiden na imejensi fisisens o dokta long ime- jensi dipatmen, saveman long marasin i stap long rural haus sik longwe tru long taun na man bilong givim sut marasin bilong mekim man slip long taim bi- long katim o operesen.

Wok bilong RHTU insait long Papua Niugini em long helpim ol provins long ol- geta taim givim nupela save bilong wok long ol lain helt woka we i save wok long helpim ol mama long karim, famili plening na ol nupela bebi bon.

Nupela websait i gat tren- ing kalenda we i givim gut- pela luksave long wanem kain helpim long helt tren- ing program i stap long PNG.

Profesa Sumbuk risain long UPNG ... Bai resis long Angoram Open

Veronica Hatutasi i raitim

OL pipel bilong Angoram long Is Sepik i gat sans nau long glasim na skelim na wokim disisen long makim gutpela lida long kisim ples bilong dai memba, Ludwig Schulze, long bai ileksen bai kamap long mun i kam.

Wanpela pikinini bilong Angoram na Is Sepik, na bikipela saveman, Profesa Kenneth Sumbuk, i risain long wok bilong em olsem Pro Vais Sansela long Yuni- vesiti bilong PNG (UPNG) long resis long Angoram Open bai ileksen.

Insait long wanpela tok gutbai bung wantaim ol het- man bilong ol wan wan di- patmen long UPNG, Profesa Sumbuk i bin tok tingting long go insait long resis long Angoram sia em bikos em i laik helpim pipel bilong em husat i laikim strongpela na gutpela lidasip long kamapim developmen na kisim sevis i go long ol rurel ples long Angoram.

Em i tok ol ples lain i askim em tu long go insait long resis bikos long long- pela taim nau, ol no lukim gutpela lidasip long kamapim ol developmen na ol sevis insait long ol ples long Angoram.

Long wankain taim tu, Profesa Sumbuk husat i wok long UPNG long 26 krismas i bin autim bikipela tok tenkyu i go long UPNG long gutpela sapot em bin kisim long kari- maut wok bilong em.

Mista Sumbuk bin stat wok long UPNG long 1987 olsem wanpela pat taim tuta i tisa na tai mol yia i go, em bin kamap olsem eksekutiv din long Skul bilong ol Sosel Saiens long 2005 na i kam inap nau, em bin stap olsem wanpela UPNG kaunsel memba na Pro Vais Sansela. Em bin wok olsem tu ekting vais sansela (VC) taim VC i no stap.

Olsem Pro VC, Profesa Sumbuk i bin mekim bikipela kontribusen long developmen bilong UPNG, long lukim olsem akademik sait i

kamap gut, long ol bikipela projek bilong UPNG na moa yet, long toktok wantaim ol Fainens na Treseri long sait bilong kisim fanding long ol projek.

Camilus Narokobi em wanpela UPNG Eksekutiv Bot memba taim em i tok tenkyu long Profesa Sum- buk long bikipela na gutpela wok em bin wokim, na gut- pela lidasip em i soim long UPNG, i bin tok kain lidasip em i gat bai em i yusim long helpim pipel bilong em.

“UPNG i sori tru long lusim wanpela bikipela saveman olsem Profesa Sumbuk na bai mipela i painim em stret.

“Tasol mipela i bilip olsem tingting bilong em long sanap long Angoram Open i gutpela bikos ol pipel i laikim kain lidasip olsem Profesa Sumbuk i gat. Ol kon- tribusen, kain lidasip na menesmen em i soim long UPNG em bai Profesa Sum- buk i yusim long go pas long ol pipel bilong Angoram,” Mista Narokobi i tok.

Nupela skul bilding bilong Tmoknai Praimeri skul

MOA long 200 pikinini long Tmoknai Praimeri skul long Westen provins bai sindaun gut insait long klasrum na kisim lainim na tok tenkyu i go long PNG Sastenebol Developmen Program (PNGSDP).

Tmoknai komyuniti i wan- pela wara komyuniti insait long Ningerum Lokol Level Gavman eria na moa sumatin i wok long go long skul, stat long Gret 3 inap long 8.

Long Jun 7, Tmoknai Praimeri skul i bin opim nu- pela dabel klasrum na wan- pela haus tisa we ol bin wokim long manimak inap long K544,440 we PNGSDP i givim long skul bilong helpim mekim dis- pela wok.

Nupela dabel klasrum ya i kisim ples bilong ol klas- rum we Kiunga/Daru Daio- sis i bin wokim long bus matiriel taim ol i opim skul long yia 2000.

Sif Eksekutiv Opisa (CEO) bilong PNGSDP, David Sode, i tok sanapim

nupela klasrum na haus tisa i bikipela samting long Tmoknai komyuniti bikos ol pikinini i mas sindaun insait long gutpela klasrum na lainim gut. Na ol tisa tu i mas stap insait long gutpela haus na klasrum long skulim gut ol pikinini.

“I bikipela samting long PNG i kamapim gutpela ples long ol tisa na ol pikinini long kisim gutpela lainim, na tu, wok long en.

“Long planti yia, ol pipel bilong dispela kantri i bin sindaun insait na skul long ol klasrum ol i wokim long ol bus metiriel, na planti taim, i nogat ol samting long sin- daun na stadi gut. Na ol tisa i save stap long ol haus i no gutpela.

“Em i bikipela samting long apgretim ol skul bild- ing, ol tising metiriel na ol ikwipmen.

“Olsem na PNGSDP i amamas long helpim wan- taim mani kontribusen long projek bai helpim kamapim gut edukesen bilong ol pikinini husat bai kamap


olsem ol lida bilong yumi long bihain taim,” Mista Sode i tok.

Mista Sode i bin luksave long kontribusen bilong Ka- tolik Sios na komyuniti long menesim projek, hatwok, lojistik na ol narapela helpim we em bin tok sapos i nogat, bai projek i kostim b ikpela mani moa.

Projek em i hap bilong tripela yia PNGSDP pro- gram we em i katim K13.5 milian long kamapim gut ol wok lon g kisim gut eduke- sen sevis i go lon g pipel long Westen provins.

Lon g dispela, mani mak inap long K2milian em ol i givim long Evanjelikel Sios long helpim karim eduke- sen sevis i go aut long pipel long tripela yia i kam, K1milian i go long Yunaitet Sios na K1.5 milian i go long Katolik Sios.

PNGSDP i skruim pro- gram wantaim Katolik Sios long tripela moa yia i kam wantaim K4.5 milian kon- tribusen moa i go long sios long karimaut ol wok.



WOKIM STAIL YET:

Tabubil mangi, Tyler Kisokau i gat 5-pela kris- mas i redi long wokabaut i go long skul long Tabu- bil Intanesenel Skul, Westen Provins we em i wokim Kindagaten 1. Em i soim sampela liklik stail bilong em taim em i wetim narapela liklik poro bilong em, Buoi long wokabaut wantaim taim Wantok i bungim em na kisim piksa long en.

Poto: Veronica Hatutasi



TOK PISIN NEWS
from Radio Australia
radioaustralia.net.au

Harim TOK PISIN long
Radio Australia
101.9FM
Port Moresby

Tok Pisin Service
6am - 7am 6080; 7240(KHZ)
7pm - 9pm 5995; 6020; 9710; 1280(KHZ)



TINGIM LAIP: Wanpela meri India husat i bin pas taim ol riva i tait, na haiwara i kamap, i kisim halivim long ol polisman long boda bilong India na Tibet. Bikpela haiwara i kamap bihainim bikpela ren long India i lukim planti handret i lusim laip pinis.

Namah i wari long Ekstradisen Triti wantaim Indonesia

OPOSISEN Lida bilong Papua Niugini, Belden Namah, i tok em i no wanbel long dispela Ekstradisen Triti namel long PNG na Indonesia.

Belden Namah i tok dispela Ekstradisen Triti bai ken putim laip bilong ol Wes Papua refuji long hevi, o i ken mekim ol Indonesia Opisal i askim PNG i salim ol i go bek sanap long kot o kalabus.

PNG Foren Minista, Rimbink Pato, na Foren Minista bilong Indoesia, i sainim triti ya long ai bilong Praim Minista Peter O'Neill, na Presiden Yudyono bihainim wokabaut bilong Mista O'Neill, wantaim wanpela gavman na bisnis delegeesen i go long Indonesia long wik i go pinis.

Mista O'Neill i tok dispela triti i karamapim ol wokbung bilong ol pipel bilong tupela kantri husat i asua o brukim loa na ronawe i go stap long

wanpela bilong tupela kantri, em ol ken askim o salim ol i go bek long kantri bilong ol.

Tasol PNG Oposisen Lida Belden Namah i tok dispela kain Ekstradisen Triti, i ken mekim Indonesia i askim PNG long salim ol Wes Papua Fridom Ektivis na politikal refuji long PNG i go bek we ol Indonesia sekuyuri-ti fos ken kilim ol i dai.

Solomon Ailans seks bisnis loa

I GAT wanpela singaut i kam aut long gavman bilong Solomon Ailans, i mekim loa long kontrolim seks bisnis long kantri.

Solomon Ailans Loa Rifom Komisn, i givim pinis sampela tingting bilong en i go long gavman long mekim ol bikpela senis long ol loa em i save karamapim seksual ofens.

Philip Kanairara, Prinsipal Ligel Opisa bilong Loa Rifom Komisn, i tok dispela askim i stap insait long wanpela ripot bilong ol.

Em i tok dispela i ripot long wok bilong lukluk gut gen logn ol dispela loa olsem rep, pasin bilong

inses, o papa mama silip wantaim pikinini, na tu, ol pasin nogut agensim ol pikinini, o child abuse.

Mista Kanairara i tok Loa Rifom Komisn i bin givim dispela ripot bilong en i go long gavman long wik i go pinis.

Reskiu helikopta pundaun na kilim dai 8-pela long India

WANPELA helikopta i pundaun taim em i wok long resiuim ol pipel long flad o haiwara long noten India, na i kilim dai 8-pela pipel husat i stap insait.

India Efes i tok dispela reskiu helikopta i bin go long sevim ol pipel long birua long noten stet bilong Uttarakhand taim em i bamim sait bilong maunten na pundaun go insait long wanpela riva.

Olgeta faipwela boskru na tripela pasindia i bin dai.

Samting olsem 600 pipel nau i bin dai pinis long ol flad wara na hap maunten i pundaun stat long las wik, na ol atoriti i tok ol i pret samting

olsem 5,000 nau bai dai long dispela birua.

Flad wara na maunten we i pundaun i karamapim na wasim aut planti long ol haus na ol viles.

Planti tausen soldia na polis nau i mekim reskiu wok.

Ol atoriti i tok bikpela wari tu em long ol kainkain sik bai kamap bikos long planti enimal i bin dai, na tu, planti handret bodi bilong pipel i stap insait long ol wara.

Ol dispela monsoon ren we i stat long Jun 15, ol i ting em i bikpela moa insait long 80-pela yia.

Barack Obama tokaut long klaimet senis plen

PRESIDEN Barack Obama bilong Amerika, i tokaut nau long nupela plen bilong gavman bilong en long paitim klaimet senis.

Insait long dispela plen, Presiden Obama i tok long bai em i yusim ol 'eksekutiv pawa' bilong en long abrusim dispela 'flet earth' saiens dinaia, o ol lain husat

i no bilip long klaimet senis, na i bin blokim ol nupela program long kongres.

Em i toktok long dispela plen bilong katim daun kabon polusen, taim em i toktok long ol sumatin long Georgetown Yunivesiti long Washington.

PNG poveti na pasin pamuk

POVETI oa pasin bilong nogat mani na kaikai, i save fosim ol yangpela meri long ol taun bilong Papua Niugini long mekim pamuk pasin.

Dispela toktok i bin kam long Pager John Glynn, husat i bin statim wanpela lain bilong halivim ol yangpela pipel long Pot Mosbi em ol i kolim WeCare Faundesens.

Pater Glynn i mekim dispela toktok bihainim ripot bilong US Stet Dipatmen olsem ol gavman opisa bilong PNG i save redim rot bilong salim ol lokol na meri bilong ol narapela kantri long mekim pamuk pasin.

Dispela ripot i tok tu olsem planti yangpela meri i save wok tu olsem ol lebera long ol logging na maining bisnis

long kantri.

Pater Glynn i tok poveti i save kamapim dispela kain wari long planti hap long graun, olsem long Yurop, Not na Saut Amerika tu, na i no long Papua Niugini tasol.

Ripot ya i tok ol PNG gavman opisa i save halivim ol kain korap wok bilong givim visa i go long ol meri bilong Esia olsem Tailen, Malesia, na Filipoins long wok long ol logging na maining kem olsem ol pamuk.

Tehakatu'u komyuniti long Solomon i tam-buim solwara

WANPELA komyuniti long Kagava Be long Rennell Ailans long Solomon Ailans i kamap wantaim wanpela program bilong lukautim ol samting insait long solwara bilong ol yet.

Dispela nau ol i kolim Tehakatu'u Marin Protektet Eria long Kagava Be, long Wes Rennell, we i boda wantaim dispela Is Rennell Wol Herites Sait.

Ailan bilong Rennell em i stap long Rennell Bellona Provins long sauten hap bilong Solomon Ailans – na Rennell Ailan yet i "namba wan bikpela ailan" long wol.

Long Isten hap bilong Rennell i gat Lek Tegano we i namba wan bikpela inlen lek long Pasifik.

Em long dispela nau Wol Herites i putim Is Rennell olsem wanpela spesol ples long lis bilong ol.

Willie Sau Kaitu'u, wanpela dairekta bilong Tehakatu'u Marin Protektet Eria na tu em bilong OceansWatch Solomon Ailans, i tok, wari i stap long wanpela logging kampani i laik go wokim logging long dispela ples.

Kagava Be we i stap klostu, em i no insait long dispela Wol Herites lis sait.

Mista Kaitu'u i tok ol pipel bilong Kagava i askim wanpela intanesenel konsavesen grup ol i kolim OceansWatch, long halivim ol long lukautim hap solwara bilong ol.

Wantaim halivim bilong OceansWatch, ol i amamas long Rennell Bellona Provinsal gavman i nau luk-save long dispela Tehakatu'u Marin Protektet Eria long dispela.

PacificBEAT

4, 5, 6am & 4pm, 5pm
including sport

Listen to Radio Australia
101.9FM Port Moresby

Radio Australia current affairs programme which focuses on island nations, bringing you morning and evening coverage of Pacific current affairs including interviews with political leaders, newsmakers, and the people who make the Pacific best.

WANTOK KOMENTRI

Liklik bisnis ken muvim kantri

SAPOS i gat wanpela samting we yumi Papua Niugini ken makim olsem namba wan strong bilong yumi, em i bilip bilong yumi ol pipel.

Long taim nogut, long taim we i nogat rot i stap long ai bilong yumi, bai yumi save painim rot yet.

Bilip i save holim strong planti liklik manmeri bilong yumi long ples.

Bilip bilong ol long holim graun, bilip bilong ol long lukautim bus-graun, na bilip bilong ol long kamapim samting bilong lukautim ol famili bilong ol, em i pasin bilong yumi PNG.

Nau, yumi kamap long mak bilong senis long painim gutpela taim bihain.

Minista bilong Tred, Komes na Indastri, Richard Maru, nau i pait strong long kirapim bilip bilong ol liklik manmeri bilong yumi long kantri.

Namba wan astingting bilong en, em long strongim luksave na nem bilong ol Smol na Midium Enteprais o liklik i go namel sais bisnis bilong yumi, bai ol i ken strongim ekonomi.

Em i strongpela bilip na tingting bilong en, tasol em i bikipela wok tu.

Dispela wiken bai lukim Mista Maru i go pas long bikipela kibung we bai kamap long Divain Wod Yunivesiti long Madang.

Em yet i go pas long bungim 15 liklik bisnismenmeri i kam long wanwan distrik long kantri, long bungim tingting, na kamapim ol loa, na wanem kain ol senis i mas kamap long kantri bilong yumi, long strongim ol SME o liklik bisnis sekta.

Tru tumas, em i no liklik wok.

Tasol long sait bilong Maru, bai yumi mas belkirap liklik long bilip bilong en.

Bipo, em i bin wanpela man i gat save tru long wok benking, na long ol rot bilong kirapim tingting na

bilip bilong ol liklik manmeri bilong yumi.

Namba wan bikipela birua bilong yumi, we Maru yet i skelim, em long tok inglis, ol i save tok 'unemployment'. Long tok pisin, em i hap tok we planti long ol yangpela bilong yumi, i save harim oltaim - 'nogat wok'.

Maru i bilip olsem ol gavman bilong bipo i no givim inap luksave, o i pret long bungim dispela bikipela salens na birua bilong gavman.

Hevi bilong nogat wok.

Watpo na em i bilip olsem?

Em bikos, taim manmeri i nogat wok, ol bai nogat rot long kisim wanpela kain winmani bilong strongim sindaun bilong ol.

Taim ol i bungim dispela namba wan hevi, ol i save lukluk long ol arapela rot bilong kisim winmani. Olsem pasin stil.

Dispela i save lukim moa loa na oda hevi i kamap, na gavman i save lusim bikipela mani long traim daunim ol hevi bilong loa na oda.

Ating Mista Maru i mas gat stret-pela tingting.

Sapos ol manmeri bilong yumi i holim wok, bai ol i nogat tingting long mekim stil pasin, o pundaun long korap tingting.

Tasol bikipela salens bilong Maru, i no stap long ol liklik manmeri bilong yumi. Nogat. Salens bilong em i stap long ol memba bilong Palamen long tok oraitim olgeta bikipela tingting na laik bilong ol pipel na komes na indastri - em bilong stretim ples bilong kamapim senis. Senis bilong strongim SME sekta bilong yumi.

Nau we mipela i redi long lukim namba wan bikipela bung bilong ol lejisleta, ol bisnis manmeri, na ol sapota bilong smol na midium enteprais sekta, yumi mas bilip olsem dispela wok senis we nau Maru i laik kirapim, i mas ron long wankain spid i go long palamen, na i go aut long ol han ejensi bilong gavman.



Bilip bilong ol pipel bilong yumi, i bungim planti birua pinis long ol yia bipo.

Tok gris, i save pulap na paulim tingting bilong ol pipel bilong yumi.

Sapos Maru i gat bilip, na sapos ol senis i kamap, mipela ol pipel i laik bilip olsem ol lida bilong yumi bai gat wankain tingting.

Bilong mekim senis, bilong gut-

pela bihain taim bilong yumi olgeta. Na i no bilong ol wanwan tasol.

BSP na Saut Afrika gat eksens trening program

SAUT Pasifik Benk (BSP) nau i givim bikipela lukluk long kamapim gut ol seils na wanpela we long mekim dispela em long inves long humen risos o ol wok manmeri.

Benk long dispela wik i tokaut olsem em i katim moa long K3 milian long sponsaim 30 wokman bilong benk long go kisim trening long Saut Afrika.

Manimak bilong K3 milian i bilong karamapim trening bilong ol wokman long tripela yia anin it long wanpela eksens program long "peer" benk long

Saut Afrika.

Toktok i kam long BSP i tokaut olsem as tingting long kamapim dispela program em long developim ol neks lida bilong menesim benk.

Olsem na BSP i kirapim wanpela lidasip eksens program wantaim ABSA Benk Limitet, em bikipela benk long Saut . Dispela eksens program bai stat long mun Septemba dispela yia.

Sponsasip bai peim kos bilong balus tiket bilong ol i go na i kam bek, ples bilong slip long en na ol narapela nit o ol samting ol bai yusim long taim ol i wokim kos bilong ol long

kantri.

Eksens program e mi hap bilong bikipela wok we bai lukim olsem ol i redim ol lida bilong tumora long ol salens ol bai bungim long en.

Olsem na na ol lida benk woklain bai kisim ol trening long ol developmen program.

Grup Sif Eksekyutiv Opisa (CEO) bilong BSP Grup, Robin Fleming i tok benk i nidim ol skil o savelain i kisim trening na ol i gat laik mekim wok olsem ol ki woklain bilong etresim ol salens we benk bai bungim long en. Senis i wok long kamap hariap stret long fainensel indastri na ol nupela

samting i wok long kamap long indastri i min olsem BSP bai nidim ol man i kisim skul long nol intanesenel maket na ol ken skruim save, visen na lukluk bilong ol i go moa.

Mista Fleming i tok ol woklain long BSP i mekim bikipela wok long mekim benk is tap long fran bilong ranim wanpela moden o benk we i op long ol nupela senis.

Mista Fleming i tok ol i wok hat stret long kamapim gut ol teknoloji long ol bikipela eria na ol sistem na fokus bilong BSP nau em long lukim olsem ol i kamapim gut ol eria bilong sevis na seils.

WANTOK

Published Weekly, Thursday, for
Word Publishing Company, Ltd.
P.O. Box 1982, Boroko, NCD
Papua New Guinea

Telephone: (675) 325 2500
Websait: www.wantokniuspepa.com
Pe bilong wanpela yia, 52 niuspepa

**Pe bilong wanpela yia
52 niuspepa**

Ples:	Air:
PNG	K220.00
AUSTRALIA	US\$110.00
ASIA PACIFIC na JAPAN	US\$150.00
AMERICA na EUROPE	US\$210.00

General Manager
Elizabeth Konga

Editor
Neville Choi

**Pt
Section
Office 2**

Published at
Able Building Complex,
Sec 58 Lot 02,
Waigani Drive.

Word Publishing Company Limited is owned by the four major churches of Papua New Guinea - Catholic 55%, Lutheran 25%, Anglican 10%, United Church 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general term acceptance are available at Word Publishing Company Ltd and are set out full on the display advertising form.

WOLNIUS LONG POTO...

1. Meri Muslim pre

OL meri Muslim Shiite i pre long srain bilong Imam Abbas, wanpela long ol biknem long lotu Islam long makam Shaabaniya seremoni long makam karim bilong Imam Al-Mahdi, namba 12 holi bikman bilong ol Shiite Muslim long Karbala, Irak. Mahdi em i namba 12 holi man husat i bin lus long namba 9 sensuri, na ol Shiite i bilip olsem em bai kam bek gen pastaim long pinis bilong graun long strongim jastis na trupela Islam lotu long wol.



1

2. Ol Afgan sekyuriti fos kamap long ples birua

OL sekyuriti fos bilong Afganistan i kamap long ples we wanpela pait i bin kamap long presidensal pales long Kabul, Jun 25.



2

3. Ol tok strongim i go yet long Mandela


A police officer leaves flowers outside the Pretoria hospital where former South African president Nelson Mandela is being treated, on June 25, 2013.

4. Paiawut bilong kukim ol bodi

OL wokman bilong kantri India i wok long rausim ol bikpela hap paiawut bilong karim i go long ples Kedarnath bilong kukim ol bodi bilong ol manmeri i dai long haiwara.



3



4

Bihainim bus haiwei go kamap long Tabubil

Anna Solomon i raitim

I NOGAT rot bilong kar namel long Tabubil na Telefomin. Yu mas kalap long balus o sapos nogat mani, wanpela rot tasol em long wokabaut.

Ol manmeri i flai long balus bai tokim yu olsem i gat ol traipela maunten, ol wara na bikpela bus i stap namel long dispela tupela hap.

Tasol ol lain Telefomin, Oksapmin na sampela Tari tu i save bihainim bus rot i kam kamap long Tabubil.

Long mun Epril, mi bin bungim tupela yangpela sumatin bilong Telefomin haikul husat i bin wokabaut long Telefomin long Trinde apinun, Epril 3 na kamap long Tabubil long Fraide apinun Epril 5.

Ol i slip tupela nait long bus. Ol tupela yangpela ya, Wawii Tan na Sandon Mai, em ol gret 9 studen na ol i gat 16 krismas.

Ples bilong ol em Ranimap long hap bilong Telefomin. Skul holide i stat na ol i wokabaut i kam long Tabubil we mama bilong Wawii i wok i stap.

Ol i bin wokabaut wantaim tupela arapela poroman bilong ol, Quentine na Mikeson. Ol i no gat bikpela skin, ol i bun nating, tasol yu ken luksave olsem ol i fit manki long wokabaut.

Long taim mi bungim ol, lek bilong ol i pen yet long dispela longpela wokabaut bilong ol.

Mi askim ol long stori long raun bilong ol na Wawii i statim stori.

Em i tok dispela i namba wan taim bilong ol long wokabaut i kam long Tabubil.

Ol i save harim stori tasol na ol i pasim tok long wokabaut long taim bilong tem wan skul holide.

Rot ol i bihainim em i olsem bus haiwe ol pipel i save bihainim i go kamap long Tabubil.

"Mipela i lusim Telefomin long 5 klok apinun long Trinde Epril 3. Mipela foapela na wan wan bilong mipela i karim inap kaukau long kaikai long rot. Mipela i ran na wokabaut hariap hariap bikos mipela i laik kamap hariap long Tabubil. Long 8 klok nait, mipela i stop na katim ol diwai na wokim giaman haus. Orait mipela i kukim kaukau na kaikai pinis na mipela slip," Wawii i stori.


Em i tok long 3 kilok bikmoning long Fonde, ol i kirap na stat wokabaut gen. Ol i kamap long han bilong Wara Sepik na brukim wara. Ol i wokabaut i go na kamap long ples Wurapmin long 5 klok moning.

I gat hevi i kamap long dispela ples, ol i paul long rot tasol sampela pipel i soim rot long ol.

"Orait, mipela i ran na wokabaut hariap gen i kam kamap long wanpela maunten ol i kolim Kela maunten.

"Maunten ya i sut i go antap stret na sapos man i pundaun bai em i dai. Mipela i bihainim arere bilong maunten i go kamap long narapela bikpela maunten gen.

"Mipela i malolo na kukim kaukau na kaikai. Mipela i kisim strong na brukim bikpela bus i go kamap long narapela maunten gen na go daun na bihainim bikpela bus i go.



Mep i soimTelefomin long Sandaun na Tabubil long Westen Provins.



Sandon Mai (lepan) na Wawii Tan i sindaun malolo long Tabubil.



Wawii na mama bilong em Anna Tan.



Wawii na Sandon i raun long taun.

"Em nau mipela i lukim wanpela man i wokabaut i kam. Em i karim gan na paia.

"Mipela i tingting planti, tasol taim em i kam klostu, mipela i luksave olsem em i wanpela ankol long ples Tifalmin. Em i tokim mipela em i laik go long Telefomin," Wawii i tok.

Ol 4-pela manki ya i kamap long Wara Lam na malolo liklik, na waswas na ol i wokabaut gen.

Ol i bungim ol pipel bilong ples Tifalmin i wokabaut i go long gaden.

Ol i kamap long namba wan haus bilong ol Tifalmin na kisim ol guava na muli na ol i kaikai na wokabaut i go.

Wawii i tok ol i kamap long las ples long Tifalmin long 12 klok belo samting.

Dispela em ples kunai na ples i hat nogut tru. Ol i lukim wanpela hul wara na ol i waswas pinis na ol i go antap long Tifalmin maunten.

Long taim ol i kamap namel long maunten, ren i stat long pundaun. Ol i strong yet na go antap long maunten we ol i painim wanpela hul bilong ston long samting olsem 3 klok apinun. Ol i go insait na wokim paia na malolo, tasol ren i stap yet olsem na ol i slip.

Biknait tru samting olsem 1 klok moning long Fraide ol i bengim tos na wokabaut i go antap na kamap long het bilong maunten.

Long taim tulait i bruk ol i kam daun long maunten na kamap long ples ol i kolim Fes Swamp. I gat 5-pela kain ples olsem ol i mas abrusim.

"Mipela i abrusim na go insait gen long bikbus na i go kamap long Seken Swap na mipela i go insait gen long bikbus na go kamap long Ted Swamp. Mipela i kamap long Fot Swamp long 8 klok moning na mipela i sutim wanpela pisin long katapel.

"Long taim mipela i kamap long Fift swamp, Sandon i lukim ol wel karuka na mipela i kisim na kaikai. Mipela i kalapim wanpela liklik wara gen na wokabaut i go insait long bikbus. Mipela i malolo na kaikai las kaukau na karuka na mipela wokabaut gen long 11 klok samting.

Mipela i kamap long maunten we yu ken lukim Ok Tedi kopamain. Graun long sait bilong maunten i bruk na bagarapim rot na ol pipel i pasim rop na i save go antap na kam daun," Wawii i tok.

Ol i kamap long ples i pulap long ol bikpela ston na bihainim wara we ol i waswas na malolo liklik tasol kaukau bilong ol i pinis. Ol i save olsem klostu bai ol i kamap long Tabubil olsem na ol i no wari tumas. Ol i abrusim wanpela man na meri bilong em husat i laik go long Tifalmin.

Ol i kamap long namba wan ples Bultem long 3 klok apinun long Fraide na bungim sampela moa pipel husat i wokabaut i go long Tifalmin. Wawii i wokabaut i kam baksait na ol i givim bisket long em. Ol i abrusim wanpela bikpela gaden arere long wara na kukim dispela pisin ol i bin sutim long moning.

Long 4 klok apinun ol i kamap long bikples Bultem na bikpela ren i pundaun.

Orait ol i wetim bas long go daun long Tabubil tasol ol i gat K4 tasol namel long ol.

Bas fe em K2 long wan wan pasindia. Tasol boskru bilong bas i tok orait na ol 4-pela i kalap.

Em i luksave olsem ol i wokabaut longwe i kam kamap long Bultem.

Wawii i tok long taim ol i kamap long Tabubil ol i lukim wanpela ankol na em i amamas na kisim ol i go long haus long Wangbin. Mama bilong em, Anna Tan i wet tu i stap.

Mama i amamas long lukim ol 4-pela i kamap gut na i no painim wanpela birua long rot.

Anna em i wanpela strongpela meri bilong lotu. Long Sarere em i go lotu na givim bikpela tenkyu i go long God Papa long lukautim wokabaut bilong ol.

Dispela em stori bilong 4-pela yangpela skul studen husat i winim ol maunten, abrusim Hindenburg Wall, brukim bus na wara namel long Telefomin long Wes Sepik na kamap long Tabubil long Westen provins insait long tupela de na nait.

Dispela pasin bilong wokabaut i kam long Tabubil em i "nomal" long laip bilong ol lain Telefomin na Oksi (Oksapmin).

Mi bungim ol wan wik bihain long dispela wokabaut bilong ol.

Wawii wantaim Sandon i raun long Tabubil na lukim famili na wan wik bihain, long Trinde Epril 17, Wawii i go bek pas.

Famili i baim K210 na em i kalap long liklik balus bilong MAF.

Mama i baim wanpela beg rais na sampela kaikai na em i karim i go bek long skul.

Na ol tripela poro bilong em, Sandon, Quinten na Markson i lusim Tabubil long Fonde Epril 18 na wokabaut i go bek.

Long niuspepa bilong Epril 9, mi lukim stori bilong memba bilong Telefomin, Solan Mirisim na ol memba bilong join distrik baset praioriti komiti bilong em.

Ol i holim namba wan miting stret long Telefomin stesin bihain long 37 yia.

Memba i toktok long ol developmen plen bilong dispela distrik long 4-pela yia i kam bihain.

Na long mun Me, memba i bin raun long ol yunivesiti na ol arapela bikpela skul insait long kantri na baim skul fi bilong ol studen bilong Telefomin. Em i givim sampela helpim i go long Telefomin haikul tu.

Ating ol yangpela pipel olsem Wawii na Sandon bai lukim sampela gutpela senis i kamap long Telefomin insait long dispela 4-pela yia. Yumi no save.

Tasol neks taim, sapos yu rileks gut tru long balus na lukluk i go daun long ol maunten na bikbus, no ken lusim tingting olsem i gat planti pipel bilong yumi long Papua Niugini tude husat i save wokabaut yet long bikbus, kalapim ol maunten na brukim ol wara long go painim sevis long taun, bikos ol i no gat narapela rot.

4:57 AM G [AUSTRALIA NETWORK](#)
6:00 AM G [EMTV NEWS REPLAY](#)
6:30 AM G [IT IS WRITTEN](#)
“Trouble with the Personal”
7:00 AM G [HILLSONG](#)
7:30 AM G [AUSTRALIA NETWORK](#)
8:00 AM G [YOGA SUTRA Ep#15](#)
8:30 AM G [BUSINESS PNG Repeat](#)
9:00 AM G [MARTIN MYSTERY](#)
9:30 AM G [OLSEM WANEM- Repeat](#)
10:00 AM G [RESOURCE PNG –Repeat](#)
11:00 AM G [COOKING ISN'T SCIENCE](#)
[ROCKET Ep#13 \(F\)](#)
11:30 AM G [AROUND THE WORLD IN 85](#)
12:00 PM G [NRL ROUND 16 – REPLAY](#)
2:00 PM G [NRL ROUND 16](#)
4:00 pm G [NRL ROUND 16](#)

TORO**BIABIA**

KANAGE



TOKWIN

Husat tru kilim ol
Saina long Koki....

PNG em olsem wanem nau? Tu-
pela mun i go pinis ol mekim
Deth Penalti olsem i wanpela
Mama Loa pinis tasol kilim dai
nating wok long kamap bikipela
tru i stap..Hap aste tasol sam-
pela birua i go kilim dai nating
wanpela Saina femili long koki
stua long 8kilok moning we
nogat man o meri i save. Tude
nau polis wok long mekim wok
glasim long kisim ol dispela
birua lain. Liklik tokwin i go

olsem, ol birua husat i kilim ol
em ol lain bilong ol yet husat i
kamapim wampela kain Mafia
kain wok insait long ol Saina
komyuniti insait long
PNG...Tingim stori long bifo tru
we sampela ol Saina i dai long
wankain birua long Hohola bek-
eri stua insait long Mosbi. Tok-
win i go olsem ol Traiads bilong
Saina i kilim ol.. Dispela tu mas
wankain!

Det Penalti i kamap,
tasol ol man i no harim
gut yet...

Planti kilim dai nating man i wok

long kamap bikipela yet long ol siti.
Yumi ritim pinis na harim gut pinis
long redio olsem gavman i oraitim
mama loa long Det Penalti.

Tasol long laswik tasol ol birua i
kilim dai nating wanpela man long
Morata na tromoi bodi bilong em
long fran bilong haus bilong wan-
pela man... na long Lae, ol raskol i
kilim dai nating wanpela sumating
long mobail fon bilong em tasol...
Ol birua i no pret long ass bilong
deth penalti.

Ating yumi kilim wanpela trabol
man long pablik na ofim sampela
pastaim..

Hariap na stat wok long det penalti!

Tokwin Tasol...

EMTV Television Guide

6:00 PM G	EMTV NATIONAL NEWS	11:20am	Grade 8 Science		TUNDE JUN 25, 2013	6:00 PM G	EMTV NATIONAL NEWS	1:50pm	Grade 6 Science
6:30 PM G	PACIFIC WAY S8 – EP#2 “	1:00pm	Grade 6 Mathematics			7:00 PM G	HAUS & HOME	2:30pm	DEPI Program
7:00 PM G	TOK PIKSA EP#24	1:50pm	Grade 6 Science	4:57 AM G	<u>AUSTRALIA NETWORK</u>	8:00 PM G	BUSINESS PNG – Ep#23	3:30 PM G	KIDS KONA
7:30 PM G	NRL ROUND 16	2:30pm	DEPI Program	5:00 AM G	<u>JOYCE MEYER</u>	8:30 PM	BODY OF PROOF	3:30 PM	HI 5 – S5 EP#3/33
9:30 PM G	60 MINUTES Ep#20	3:30 PM G	KIDS KONA	5:30 AM G	EMTV NEWS REPLAY	9:30 PM G	NEWS REPLAY	4:00PM	SNOBS # 15 (<i>Family Drama</i>)
10:30 PM MAO	SUNDAY NIGHT MOVIE	3:30 PM	HI 5 – S5 EP#1/33	6:30 AM G	TODAY		Followed by Australia Network	4:30PM	FOREIGN EXCHANGE #10 (<i>Comedy</i>)
12:40 MN	HILLSONG Rpt....	4:00PM	SNOBS # 13 (<i>Family Drama</i>)	9:00 AM	CLASSROOM BROADCAST			5:00 PM G	TRICKY TV EP#11 – Re-run.
12:30 AM G	NEMTV NEWS – Replay	4:30PM	FOREIGN EXCHANGE #8 (<i>Comedy</i>)	9:00am	Grade 7 Mathematics			5:30 PM G	SKILICIOUS EP#8
		5:00 PM G	KITCHEN WHIZ	9:50am	Grade 7 Science			5:57 PM G	CRIME STOPPERS
		5:30 PM G	TOTALLY SPIES EP#7	10:40am	Grade 8 Mathematics			6:00 PM G	EMTV NATIONAL NEWS
			“The Fugitives”	11:20am	Grade 8 Science			7:00 PM G	STATE OF ORIGIN BUILD UP#2
		5:57 PM G	CRIME STOPPERS	1:00pm	Grade 6 Mathematics			7:30 PM G	STATE OF ORIGIN – GAME 2
		6:00 PM G	EMTV NATIONAL NEWS	1:50pm	Grade 6 Science				BLUES vs. MAROONS
		7:00 PM G	NRL ROUND 15	2:30pm	DEPI Program			9:30 PM G	TOK PIKSA Ep#23 – Repeat....
			TITANS vs. STORM at the Skilled Park.	3:30 PM G	KIDS KONA			10:00 PMG	EMTV NEWS REPLAY
		8:57 PM G	C-MTV TOKSAVE with Kevani Mado	3:30 PM	HI 5 – S5 EP#2/33				Followed by Australia Network
		9:00 PM G	E-COLA SPORTS SCENE EP#18	4:00PM	SNOBS # 14 (<i>Family Drama</i>)				
		9:30 PM G	NEWS REPLAY.....	4:30PM	FOREIGN EXCHANGE #9 (<i>Comedy</i>)				
			Followed by Australia Network	5:00 PM G	KITCHEN WHIZ				
				5:30 PM G	DANI'S HOUSE – EP#8:				
4:57 AM G	<u>AUSTRALIA NETWORK</u>					4:57 AM G	<u>AUSTRALIA NETWORK</u>		
5:00 AM G	JOYCE MEYER					5:00 AM G	JOYCE MEYER		
5:30 AM G	EMTV NEWS REPLAY					5:30 AM G	EMTV NEWS REPLAY		
6:00 AM G	TODAY					6:00 AM G	TODAY		
09:00 AM	CLASSROOM BROADCAST					09:00 AM	CLASSROOM BROADCAST		
9:00am	Grade 7 Mathematics					9:00am	Grade 7 Mathematics		
9:50am	Grade 7 Science					9:50am	Grade 7 Science		
10:40am	Grade 8 Mathematics					10:40am	Grade 8 Mathematics		
						11:20am	Grade 8 Science		
						1:00pm	Grade 6 Mathematics		

OI Program na Kilok i
ken senis oltaim...

Ol Program na Kilok i ken senis oltaim...

Raun wantaim Kanage olgeta wik



NEM: Nick Kwau
KRISMAS: 30 (Man)
ADRES: PO. Box 1349, Wewak, East Sepik Provins
SAVE LAIKIM: Ritim buk, singsing, go Lotu, mekim pren wantaim arapela and trevol.

NEM: Raphael Iwap
KRISMAS: 18 (Man)
ADRES: St. Michael Secondary School, PO. Box Private Mail Bag, Madang Provins
SAVE LAIKIM: Pilai gems, pilaim musik, operetim kompyuta, wok teknisen, ritim buk na go long skul

NEM: Vincent Awon
KRISMAS: 30 (man)
ADRES: Kamate Coca Co-operative Society Limited, PO Box 298 Madang Provins
SAVE LAIKIM: Welding, cocoa trena, menesim bloks, Raising Beans long ekspot, mekim fani, harim musik na painim wanpela meri long maritim na stap wantaim oltaim.

NEM: Junior B. Dadis
KRISMAS: 32 (Man)
ADRES: College of Distant Education, PO Box 2071, Yomba, Madang Provins
SAVE LAIKIM: Go danis, harim reggae musik, lukim CD, tok pilai na go swim

NEM: Jason Elmon
KRISMAS: 19 (Man)
ADRES: Bema High School, PMB Bema, Lae Post Office Morobe Provins
SAVE LAIKIM: Mekim pren, pilai soka, go Lotu, mekim fani na toktok wantaim ol narapela lain.

NEM: Gabriel Bania
KRISMAS: 23 (Man)
ADRES: St. Christopher Primary School Turubu East Coast, C/- Bill Orenge PO Box 466, Wewak ESP
SAVE LAIKIM: Autim tok bilong God, serim toktok ol samting, pilai gospol musik, helpim na mekim wok marimari na go Lotu.

NEM: Jenna Hill
KRISMAS: 35 (Meri)
ADRES: PO Box 90, Adoagyiri, Nsawam Ghana, West Africa - 00233 541705015 e-mel: waysofl@yahoo.com
SAVE LAIKIM: Kanntri musik, kukim kaikai, raitim pas na painim wanpela man long maritim

NEM: Rex Yatapsa
KRISMAS: 30 (Man)
ADRES: Wambi DC, PO Box 352, Bulolo Morobe Provins
SAVE LAIKIM: Go Lotu, serim tok bilong God wantaim arapela, stretim hevi bilong ol arapela manmeri, Wok gol na wokim gaden.

NEM: Robert Daniel
KRISMAS: 14 (Man)
ADRES: Kanabea Catholic Mission, PO Box 90, Via Kerema, Gulf Provins
SAVE LAIKIM: Pilai gita, volibol, soka, tats, mekim fani, stori, watsim TV, harim Lotu musik, go skul, tek pat long yut wok, go Lotu na lukautim ol enimal na plens.

NEM: Awaten Kembo
KRISMAS: 20 (man)
ADRES: Bema High School, PMB Lae, Morobe Provins
SAVE LAIKIM: Pilai volibol, vok, basketbol, harim musik, mekim fani, go Lotu, ritim buk na niuspepa na stori wantaim ol poroman-meri.

Tripela poro i go long kalabus

NEM bilong ol em Fafti, Yokomo na Kanage. Ol i no save long tok Inglis na ol i save stap long ples tasol. Wanpela taim ol plen long go long taun long lainim tok Inglis. Fafti go pas long taun, long taun em harim ol man tok, "3 of us", em lokim tasol long het na kam long ples. Neks de Yokomo go long taun na kam wantaim tok Inglis, "Because of money". Laspela man long go long taun em Kanage na em i kam bek wantaim tok Inglis bilong em, "Lets go". Potnait Fraide kam na tripela laik traim tok Inglis bilong ol na ol i go long taun. Long rot ol raskol kilim wanpela man na kisim mani bilong em na ronawe, na tripela brada go kamap long hap we man i dai stap. I no long taim polis kam



kamap na askim ol, "Who killed this man?" Fafti tok, "3 of us", Polis askim gen, "Why did you kill him?" Yokomo bekim, "Because of money", Polis bel hat na tok, "You want me to take you to jail?" Kanage ansarim, "Lets go, na polis kisim tripela go long kalabus.

Sims 4Mile,
 Popondetta Awara Tasol

'Earthquake Man'

KANAGE em bilong ples Motonau long Not Kos Rot long Madang. Em i raunraun na em i hangre nogut tru na em go long

Marit i nogat gutpela sindaun

Dia Laipain,

Mi bin marit 5-pela yia nau na mi tupela i gat wanpela pikinini, tasol man bilong mi no save stap wantaim mipela olsem ol marit lain i save mekim.

Olgeta taim em save bisi tumas long wok bilong em olsem wanpela kontrakta.

Em i save go long ol narapela ples o provins long mekim wok bilong em na lusim mi tupela long hia.

Em i save kam lukim mitupela wanpela taim tasol insait long wanpela mun sapos em i laikim. Em no save ring o raitim leta i kam long mi tupela taim em i stap long we o long narapela provins.

Mi no save long as bilong dispela kain marit, bilong wanem na em i no save gat aim long stap wantaim mitupela taim em stap long malolo bilong em.

Em oltaim save tingting tumas na stap long wok bilong em, na i save tingting long mitupela.

Mi save askim em sapos em i ken painim wanpela hap long rentim long wok ples tasol em i no harim tingting bilong mi, lusim i go nating na i no save mekim wanpela samting.

Long dispela as tasol i wokim na mi nau i stat long toktok wantaim eks-poroman bilong mi husat i stap long narapela provins. Dispela pasin i orait o nogat?

Em i toktok wantaim mi olgeta de long fon, pas na tu em i save salim ol kat bilong ol kain spesol de. Dispela i soim olsem em i gat pasin bilong laikim mi tumas we mi tu i laikim em, tasol mi pilim krangi liklik long em bai lukautim pikinini bilong narapela man.

Yu ting wanem long dispela? I gat wei we mi ken bihainim o mekim long stretim dispela kain hevi?

DESPERATE FOR INTIMACY

Dia Pren,

Mipela i sori long harim dispela hevi bilong yu long dispela taim i nogat wanpela i sanap baksait long we i ken helpim yu. Mipela i save olsem marit laip em i no isipela samting na i save kisim taim, komitmen, strongpela tingting na hatwok long mekim kamap gutpela o sanapim long gutpela graun.

Yu bin marit 5-pela yia olgeta, tasol man bilong yu i save spenim taim bilong em wantaim yu tupela taim em i kam long malolo bilong em. Mipela i laik save long wanem as na em i save spenim taim long wok bilong em na i no long famili bilong em. Ating i gat as bilong wanem na em i mekim olsem. Yu bin



traim long askim em tu long dispela samting o nogat?

Yu tokaut olsem em i save kam lukim yu tupela wanpela taim tasol insait long wanpela mun taim em i kam long malolo bilong en. Mipela i laikim yu long mekim sampela samting long amamasim em na long soim em olsem yu laikim em tumas. Dispela bai i no inap isi tasol mi askim yu long mekim wantaim pasin laikim na olgeta tingting bilong yu. Kain olsem, spenim sampela taim wantaim em, kukim spesol kaikai o sapos yu ken tokim em long raun wantaim yu tupela long piknik spot, gem na ol arapela samting ol famili ken gat taim long stap wantaim na wokbung wantaim.

Yu tokim mipela olsem long dispela hevi tasol, na yu stat long gat tingting ol bipo poroman bilong yu. Long taim boipren bilong yu i save ring olgeta de, raitim pas na tu salim kad bilong ol spesol de o okeisen olsem tasol i mekim yu bilip olsem em i stil laikim yu tumas.

Pren, wanpela impoten samting yu mas save long laip, em tingting yu mekim long stap wantaim man bilong yu na dispela tingting yu mekim wantaim eks-boipren bilong yu. Yumi save mekim tingting olgeta taim long laip bilong yumi na dispela ol rot o tingting yu mekim bai i soim bihain taim bilong yu, sapos bai yu amamas o bai planti kainkain hevi bai kamap.

Mipela i laikim you long tingting gut pastaim taim yu mekim samting long laip bilong yu.

Maski longtaim boipren bilong yu i save ringim yu, raitim leta o save salim kat bilong ol spesol de long yu, dispela i soim tu olsem em i laikim yu tumas o nogat?

Nogut em i wok long raun wantaim wanpela meri o em i marit na i gat ol femili bilong em i stap na em i tingting long stap wantaim ol.

Pren, yu bin askim, bai yu mekim wanem? I gat sampela rot long kisim long stretim dispela kain hevi o nogat? I nogat wanpela trupela bekim long dispela kain hevi yu bungim, tasol i gat ol rot yu ken kisim long helpim yu long mekim gutpela sindaun bilong pikinini man bilong yu long bihain taim na tu wantaim

haus na nogat kaikai. Isi tasol Kanage i stilim pis bilong meri bilong em na laik stat long kaikai i stap na wanpela poro kam na kolim nem bilong em, em guria nogut tru na laik tok yu mekim na mi guria na em abrus na tok, "Yu make me and i earthquake ya." Poro harim na tok stil man wantaim rong tok pisin.

Freda Melchior
 Motonau, Madang

Ol skwat!
 Salim ol gutpela Kanage tok pilai i kam long:
 Kanage Tok Pilai
 P.O. Box 1982,
 Boroko, NCD
 Port Moresby.
 Email:
 jwilson@wantok.com.pg

man bilong yu. Daunbilo em ol sampela askim na tingting we yu ken bihainim:

Yu stap olsem wanpela marit meri. Marit bilong yu i ligol o nogat? Dispela hia em ol 3-pela kain marit ol man-meri, gavman, o sios i luksave aninit long loa bilong kantri bilong yumi. Marit long kastom sait, em i olsem ol bai i baim yu long kaikai na tredisinol samting wantaim moni ol i save kolim braid prais (paying of bride price), marit long sios o haus Lotu we olgeta kongrigesen i witnesim na Sivil Marit (civil marriage) em marit we yu rejisterim marit aninit long sivil rejistri opis we gavman i luksave. Sapos marit o relensensip we tupela patna i stap wantaim tasol sapos i nogat wanpela luksave bilong loa orait dispela di-fekto rilensensip o tupela i marit tasol nogat man i luksave dispela kain marit.

Dispela em ol as bilong samting long wanem na man bilong yu i save wokim narakain samting. Sapos yu laik save gut long wanem samting i rong long em, moa beta yu spenim taim wantaim em na mekim samting we bai i soim olsem yu laikim em tumas. Yu ken lukluk long ol samting yumi bin toktok long ol pinis stap antap long kisim moa helpim.

Yu olsem wanem sapos man bilong i panim aut olsem yu wok long raun wantaim bipo poroman bilong yu?

Long ol dispela i moa beta long yu tingting gut pastaim bihain long mekim wanem samting. Mipela i tok strong long yu, long yu mas prea na wet na no bel hat kwik bai God yet i mekim rot bilong yu. Em bai i ken soim ol hait pasin bilong man bilong yu, na tu soim yu long gutpela rot na givim yu gutpela tingting long mekim o bihainim.

Yu ken lukim olsem, taim yu i no stretim dispela hevi namel bilong yu tupela na raun wantaim narapela i givim yu planti samting long tingting na mekim.

God papa i laikim yu tumas na em i gat gutpela plen long laip bilong yu. Mipela i askim yu gen long yu mas prea na wetim God yet i ken stiaim yu long gutpela rot.

Pren bilong yu,

Laipain.

Sapos yu gat wari, rait i kam long Lifeline, P O Box 6047, Boroko, NCD. Telipon:3260011. Raitim trupela nem na etres bilong yu na bai mipela i ken salim bekim long pas bilong yu. Bai mipela i no inap putim trupela nem bilong yu long stori.

Laipain

PNG Ekonomi groa tasol rurel pipel kisim taim

Stanley Nondol i raitim

EKONOMI bilong kantri i groa na gavman i mekim nesnel bast long bikipela bilian kina mani mak tasol bikipela milian populesen long rurel ples i no kisim gut ol besik sevis.

Tresari Minista Don Polye i tokaut olsem ekonomi bilong kantri bin groa long sampela yia nau tasol gavman i no skelim gut bikipela milian kina mani i go long olgeta ples, dispela i mekim bikipela populesen stap long rurel ples i kisim bikipela hevi long planti yia.

Minista Polye i tok, bikipela mak populesen bilong pipel long dispela kantri i nogat gutpela haus, helt sevis i bagarap long planti provins, nogat gutpela waara saplai long dring, ol pikinini i no kisim kwaliti edukesen na planti pipel i nogat mani.

Tresari minista i tok dispela i kamap taim kantri lukim bikipela win mani. Em i tok as bilong dispela em, gavman i no skelim mani gut go long olgeta hap we bikipela populesen stap long rurel ples.

Minista Polye tok gavman

bilong Praim Minista, Peter O'Neill i luksave long dispela hevi pinis na bin skelim mani gut long 2013 baset long gutpela hap we ol pipel long rurel ples bai kisim sevis.

Minista Polye i tokaut long 5-pela rot we O'Neill gavman i lukluk long stretim sidaun bilong ol pipel.

1. Apim mani bilong, provinsel gavman, LLG na distrik long taim bilong baset. Polye i tok O'Neill gavman long 2013 baset givim K10 milian long wanwan distrik long DSIP na K0.5 milian long LLG. Dispela em namba wan taim LLG kisim bikipela fanding long nesenel gavman.

2. Apim mani mak bilong Tenda bot. Gavman givim Provisnel Tenda Bot pawa long tok orait long wok long K5 milian

3. Sapotim SME o ol liklik bisnis. Gavman givim K320.3.milian long sapotim agrikalsa sekta. K80 milian bilong dispela mani go long Nesenel Developmen Benk long sapotim liklik bisnis wantaim dinau mani na K18 milian i go long Maikro Ekspensen Program wantaim K10 milian i kam long ADB. Minista Polye tok gavman bai sapot liklik bisnis

na wok agrikalsa wantaim bikipela milian long ol pipel ken mekim bisnis na gat mani na groa wantaim mani.


4. Tresari Minista i tok gavman i wok nau long kamapim Soveren Wel Fan o SWF. Em tok ol win mani long maining na petroleum bai go long SWF na ken sapotim arapela projek olsem agrikalsa na bisnis.

5. Gavman bai sapotim Maikro Ekspensen Program na dispela bai givim sans long ol pipel long rurel ples bai mekim liklik bisnis wantaim sapot bilong benk na ol arapela fainensel bodi.

Minista Polye mekim ol dispela toktok long taim bilong lonsing bilong ANZ Go Mani long Pot Mosbi long dispela wik Tunde.

Em i tok 85% bilong PNG populesen i stap long rurel ples i no gat aset bilong ol na tu, inkam bilong ol i liklik tru na ol painim hat long peim ol besik sevis olsem skul fi a haus sik fi.

Memba bilong Kandep tok bikipela populesen tu i no go skul na no save long rit na rait na ol painim hat long opim benk akaun bilong ol na ol no save sevim mani mani na bikipela populesen stap pua o turangu.



Jeneral Menesa bilong NASFAN Vari Lahui sanap klostu long finga prin masin.

Nasfund lonsim Baio-Metrik luksave

NASFUND Kontributas Sevings na Lon Sosaiti i kamapim nupela rot long givim gutpela sevis long ol memba bilong em wantaim baio metrik ID masin we ol memba yet bai putim pinga prin long masin na yusim ol sevis bilong NASFUND.

NASFAN i lonsim tas-skrin masin dispela wik long Boroko brens long Pot Mosbi we ol memba bai putim pinga prin long skrin bilong masin na masin bai opim menu na ol ken go insait long akaun bilong ol na yusim kainkain sevis.

- Ol sevis memba bai yusim em long sekim akaun balens na trenseksen histri
- Ol memba ken aplai long lon o dinau na ken sekim tu sapos ol inap long kisim lon

o nogat

-Akaun stetmen - ol memba ken askim long stetmen long akaun bilong ol na makim wanpela e-mel adres we NASFAN ken salim kam long ol.

Ol memba husat i rejista long usim dispela tas-skrin ID tasol bai yusim dispela sevis na husat ino rejista bai sanap long longpela lain long ol wokman meri long kaunta bai sevim ol.

Jenerel Menesa bilong NCSL, Vari Lahui, i tok NASFUN i kamapim dispela long ol kastoma mas noken westim taim long sanap long longpela lain long kisim sevis. Em tok ol traim dispela pinis na em wok gut tru wantaim sampela memba husat i rejista.

Mista Lahui tok dispela sevis bai suruk go long Lae bihain long sampela wik na tu bai go long ol arapela senta bilong NASFUND raun long kantri.

Mista Lahui tok NASFAN i gat 175 membas na NCSL gat 65,000. Em tok em gat bikipela tingting long lukim moa long 100,000 membas bilong NASFAN bai rejista na usim dispela bio-metrik ID long arere bilong 2013.

Mista Lahui i tok, NASFAN i statim dispela sevis long yia 2012 na nau surukim i go long finga prin na bai toksave long olgeta memba bilong NASFAN long usim dispela long mekim sevis isi na tu sevim taim biulong long sanap long lain.

OK TEDI bai bildim,rot, bris na helt sevis long WP

OL ples lain long Westen Provins husat save kisim bagrap long kainkain sik bai nau i lukim han mak bilong Ok Tedi Developmen Faundesen o OTDF bihain long em i sainim 4-pela bikipela projek bilong rot, bris na helt program long Pot Mosbi long dispela wik.

Kantri na wol tu save olsem Westen Provins em wanpela Afrika insait long Papuan Niugini we nuis bilong ol ples lain long Westen Provins dai long kainkian sik go long olgeta hap. Dispela hevi save kamap planti taim long ples we i gat bikipela gol na kopa main.

OTDF kampani bilong papagraun yet long namba wan taim i laik lukluk long stretim helt sevis, stretim rot na bildim bris long halivim ol ples lain bihain long bikipela namba bilong ol ples lain i dai long ol kainkain sik i no long taim i go pinis.

OTDF i sainim 4-pela bikipela prijek wantaim 3-pela konstruksen kampani long K125.4 milian na wok bai stat kwiktaim.

Ol projek em Midel na Saut Flai o Komunuti Main Kontinuesen Agrimen o (CMCA)

Eria Helt program, Aiambak go long lek Mari rot, Pampe-nai Rot na Nupmo go long Ningerum Putbris long not Flai distrik.

Helt program long K43 milian bai Abt JTA bai menesim na mekim projek insait long 5-pela yia na Aiambak Leik Mari rot long K59.9 milian na Pampeniai rot long K12.1 milian em Lokel kontrakta, Stawes i winim kisim kontrak long mekim.

Nupmo go long Ningerum putbris long krosim OK Tedi riva projek em Wild Cat Kontrakta bai mek long K10.4 milian.

Olgeta dispela projek bai stat long neks mun na rot na bris projek bai pinis long wanpela yia.

Fanding long ol dispela 4-pela projek i kam long Komunuti Main Kontinuesen Agrimen o CMCA hap bilong Westen Provins Dividen Trast Fan o WPPDTF.

Minista nilong maining Byron Chan tok orait long dispela fanding long Decemba 2012 bihain long Sekretari bilobng Minerel na Polisi na Jio Hajad Menesmen i mekim wanpela sab-tinuesen Agrimen o (CMCA)

Maining we secretary em lukautim dispela projek mani bilong WPPDTF.

OTDF Siaman na Menesing Direkta bilong OK Tedi, maning Nigel Parker, taim sainim ol dispela projek long Mande dispela wik long Pot Mosbi i tok taim pinis bai lukim ol pipel bilong Westen provins bai kisim gutpela sevis bilong besik helt, edukesen na tu liklik bisnis bai op long ol.

Sif Ekseketiv Opisa bilong OTDF, Ian Middleton, i tok OTDF em i komited long stretim laip bilong ol pipel long Westen provins long ol besik sevis na ol pipel bai kisim sevis long CMCA pekeg we OK Tedi maining save givim.

Em tok bikipela sevis nau em bilong helt program long helpim moa long 84-pela haus lain we gat 65,000 man meri na pikinini stap long Midel na Saut Flai. Mista Middleton i tok OTDF save pinis long hevi bilong jelt wantaim infrastraksa long Midel na Saut Flai rijen na taim dispela projek i stat na pinis bai lukim bikipela senis i kamap long laip bilong ol pipel long Westen Porvins.



Tresari Minista Don Polye bihain long mekim toktok long taim bilong ANZ Go Mani lonsing long Pot Mosbi i traim Mobail Benking long Mobail pon.



POTO (L-R.) Sandra Fore, Stanerd Wai, (Tupela bai go Saut Afrika) na BSP Group Sif Eksektiv Opisa Robin Fleming, ABSA Rep Marietjie Ferreira, Joyce Narakobi na BSP Jenerel Menesa bilong HR, Giau Duruba.

BSP bai salim wokman go trening long Saut Afrika long K3m

Stanley Nondol i raitim

Bikpela Benk long kantri, BSP benk, long aste i takaut long salim 30-pela wokman bilong em i go kisim moa trening long Saut Afrika long mani maki bilong K3 milian we benk tok em gat bikpela luksave long developim humen risos long PNG.

BSP Mensing Direkta Robin Fleming i sainim wanpela Memorandum ov Adnas-tanding o MOU wantaim bos

bilong Retel na Bisnis lidasip bilong wanpela bikpela benk bilong Saut Afrika, ABSA Benk Ltd, Marietjira Feraeria, long wanpela eks senis program.

Aninit long dispela MoU, 30-pela wokmanmeri bilong BSP bai go kisim trening insait long wanpela yia na, tripela wokman na meri bilong BSP, Standerd Wai, Sandra Fore na Joyce Narakobi bai lusim kantri go long Saut Afrika long Septemba 2013 na ABSA benk bai salim tripela wokman kam long PNG long stat bilong 2014.

Mista Fleming i tok bikpela tingitng bilong benk long kamapim dispela program, em long developim ol PNG human risos long kisim gutpela save long ron bilong benk na taim ol kam bek bai yusim ol trening save na ol ken menesim benk long kantri.

Long dispela senis program bai lukim ABSA benk Limitebilong Saut Afrika na BSP wokman meri bai lainim kainkain trening long developim program, kosing, na sapotim na mentorim ol wok-

lain long benk.

Mista Fleming i tok, ol skills, trening, na gutpela save long ronim benk em ki samting na em bikpela salens long benking indastri we BSP i lukluk long developim ol wokman long save long kainkain save bilong benking bisnis. Em tok BSP wokmanmeri mas save long hau ol ovasis benk save ron.

Mista Fleming i tok, BSP benk save go paslain long soim ol pipel kainkain nupela rot bilong benking na, tok benk bai givim sans long ol

wokmen na meri long kantri long developim lidasip na menesmen skills ol i nidim long stap anatp long save bilong benk sekta long pasifik.

Mista Fleming i tok, BSP bin wok hat tru long givim gutpela sevis long kastoma long ol nupela save o teknoloji na benk tu lukluk long investim mani long helpim ol PNG sitisen husat wok long BSP long kisim gutpela save long ronim benk na BSP benk ken stap long seif han long bihain taim.

Mista Fleming tok, BSP i

amamas tru long sainim MOU wantaim ABSA we em tu wanpela bikpela benk long Saut Afrika na groa wankain olsem BSP. Em tok, em gat bilip long BSP ken grow moa na wokman nameri ken kisim gutpela save long dispela eks-senis program wantaim ABSA bilong Saut Afrika.

Long wankain taim Miss Marietjira Feraeria tok em gat bikpela amamas long sainim MoU wantaim BSP na tok gutpela lak long husat bai go long Saut Afrika long dispela program.

OTML sanapim nupela raba risaikling fektori

OK Tedi Maining Limitet (OTML) i komisanim Raba Risaikling Plent bilong em long wokim wanpela bikpela raba fektori.

Long ripot i kam long OTML Midia na Pablik Rilesens Dipatmen, dispela em i namba wan raba risaikling fektori long maining indastri long PNG.

Risaikling i min olsem tanim (ol raba taia) i go long nupela prodak.

Ol bai yusim ol raba taia bilong ol bikpela dam trak na ol konveya belt ol i yusim long main long ol yia bipo, tasol ol i stap nating.

Wok long komisanim dispela Raba Risaikling Plent i bin kamap long las mun. Long dispela taim, ol bikman bilong OTML i gat long em Menesing Dairekta na Sif Eksektiv Opisa (CEO), Nigel Parker na ol sinia menesa na woklain i bin amamas long lukluk raun insait long plent eria.

Dispela Raba Risaikling fektori i stap long olpela taia yat long Tabubil Laydown eria na i longwe long bikpela rot nap les we ol woklain i slip long en.

Ripot i tok fektori bai tanim ol bikpela taia bilong ol bikpela dam trak we kampani i bin yusim long 30 kismas i kam inap nau, na ol i hipim i stap.

Tai mol i presim wanpela baten, plent o fektori i bin stat long wok na ol konveya belt bilong plent i katim ol dam trak taia na ol konveya belt i go ol liklik hap stret we sais bilong ol inap long mak namel long 1 na 3 milimita.

Ol bin wokim plent ya na baim long kantri denmak long Yurop.

Insait long wanpela awa, fektori i ken kamapim tripela ton ol liklik liklik hap raba, na seperetim na rausim ol hap ain i pasim ol raba taia na ol konveya ol i risaiklim.

Bot Dairekta bilong OTML

na Siaman bilong Sefti na Teknikel Edvaiseri Komiti, Allan Roberts i bin wokim komisanim.

Em tasol i bin presim mejik baten long kontrol rum na bikpela Raba Risaikling Plent i kirap na statim wok.

Wantaim rekot i no gutpela we kampani i bin gat long taim BHP i bin papa long OTML long kamapim bagarap long envaironmen, dispela Risaikling Plent bai givim gutpela piksa long inapim visen o driman bilong kampani.

Dispela em long daunim ol bagarap we ol pipia bilong main i kamapim long Westen provins.

Menesing Dairekta na CEO, Mista Parker, i tok risaiklim ol taia we ol i yusim long main long dispela rot e mi namba wan long wol, na ai bilong wol i lukluk strong long samting we OTML i laik wokim na ol wok kamap insait long ol mun i kam.

"Dispela plent o fektori bai risaiklim ol taia we main i bin yusim, ol konveya belt na ol narapela strongpela pipia bilong main na tanim i go long prodak bai ol i yusim na i no inap long bagarapim envaironmen.

"Plent bai risaiklim o tanim planti ton long ol maining taia, ol pipia bilong main long las 30 kismas we ol i sapos long tromoim na planim insait long graun, na kamapim hevi long ol futja jeneresen o ol pikinini bai kam long bihain taim," Mista Parker i bin tok.

Hevi bilong ol wan wan taia bilong ol dam trak na ol narapela bikpela trak inap long tripela ton.

Mista Parker i bin givim luksave i go long Hendrick Min na lain bilong em husat i wokim Raba Rikonstraksen Plen long ol kontribusen na hatwok ol bin mekim long stat bilong projek inap em i pinis.



OL LIKLIK HAP RABA: Masin i kresim o mekmekim ol bikpela taia i go long ol liklik meme raba. **Poto: OTML Pablik Rilesen na Midia**



FEKTORI SAIN: Sain i soim ples we nupela raba Risaikling Plent o Fektori i stap long en. **Poto: Veronica Hatutasi**

BSP bai opim bek Kerema brens

OL pipel bilong Galp Provins i ken pulim win gut long wanem, ol bai wokim benk bilong ol long Kerema taun yet, na i noken tro-moim bikipela mani long baim trenspot na kam long ol benk long Mosbi.

Dispela i bihainim wangepela agrimen we BSP Benk na Galp Provinsel Gavman na Edministresen i sainim long kirapim wangepela rurel brens long Kerema bihain long provins i nogat benking sevis long 4-pela yia bikos long stil pasin we bikipela stilman long benk long dispela kantri, na kalabus man i ronawe hait i stap stap, William Kapris na lain bilong em i bin mekim long yia 2008.

Stil pasin ya i bin lukim bikipela mani mak i go long han bilong ol stilman

Eitpela woklain bai wok long dispela brens na givim ol sevis olsem diposit o putim mani i go insait, rausim mani na opim nupela akaun.

Wok long nupela Rurel Brens bai stat long dispela mun na pinis klostu long pinis bilong dispela yia.

Ol bai opim tu ol ejen o han bilong dispela benk

long ol wan wan distrik.

Ol i sainim pinis wangepela agrimen long sanapim ol ejen long ol distrik olsem Ihu long Wes Kerema.

Benk bai kisim Mobail Benking na ol woklain bai go aut long ol komyuniti long kisim ol kastoma.

BSP grup sif fainensel opisa na Deputi Sif Eksekutiv Opisa (CEO), Johnson Kalo i tok BSP i amamas long sainim agrimen wantaim Galp Provinsel Gavman na Edministresen.

Galp Gavana, Havila Kavotaim em i tok amamas long BSP i go bek long provins i bin tok 200,000 pipel bilong provins i bin kisim taim tru taim BSP Benk i stopim olgeta sevis bilong em insait long 4-pela yia, na ol wok b isnis tu i bin go daun olgeta.

Tasol em i tok benk i wokim gutpela disisen bikos long sotpela taim i kam, Galp Provins bai lukim bikipela developmen long PNG LNG projek.

Em i tok long benk i go bek long provins i bikipela blesing long ol pipel husat i bungim hevi long 4-pela yia nau.

Revenu bilong Digicel i groa long 8%

BIKEPela Mobail pon kampani, Digicel i tokaut olsem bisnis bilong em i wok long groa go antap moa inkam tu groa insait long Kerebian, Sentral Amerika na Pasifik long makim bilong pinis bilong mun Mas long dispela yia.

Digicel Grup, i mekim bisnis long 30-pela maket long Kerebian, El Salvado na long Saut Pasifik I ripot olsem revenu go antap long \$2.78 bilian o moa long K8 bilian i makim 8% groa long narapela yia go long narapela yia.

Wantaim ol Digicel kastoma stap long 12.9 milian insait long 30 pela maket long wol, bisnis groa strong na revenu bin suruk go antap we Digicel tok kantri olsem Haiti, PNG, Trinidad na Tobago na Suriname

maket i strong na groa.

Taim Digicel i go het long rolim aut 4G netwok we em beis long HSPA+ Teknoloji na surukim maket bilong smatpon, data na veliu eded sevis revenu i sanap long 23% na dispela em sevis reviniu-na em bin 20% long pastaim kwata.

Digicel Grup CEO taim em tokotk long groa bilong bisnis, em amamas tru long lukim kastoma i wok long yusim ol sevis bilong digicel long olgeta maket na ol yusim gut tru 4G netwok. Em tok kampani bai go het long givim sevis bilong ICT/Solusen.

Em tok bikipela tenkyu long ol komited wokman bilong kampani long mekim bikipela wok long wanwan maket long kamapim gutpela rekod bilong bisnis.

Westpac i putim K1000 Masta Kad Gif kad long resis

WESTPAC Benk inau apim (*Women in Business*) o Westpac Meri long Bisnis *Outstanding Womens Award* o Outstanding Meri Award we em tokaut las wik i go antap moa na putim K1000 long resis long bisnis haus na komunyuti husat salim nominesen bai winim.

Dispela bai lukim sapos wangepela bisnis haus o komyuniti i makim wangepela mari long go long resis bilong winim Westpac Awod long 5-pela grup bai go insait long dro long winim wangepela bilong tripela K1000 Masta Kad gipt kad.

I gat 5-pela awod grup; Praiswatahaus Praivet Sekta Sekta Awod, Stimsip Pablik Sekta Awod, SP Brevery Entraprenua Awod, Trukai Komunyuti Awod na IBBM Yang Acheiva Awod. Wina bilong wanwan grup bai kamap kendidet long stap long bikipela resis bilong winim taitol bilong Westpac Autstandin meri Awod bilong 2013.

Wina bilong wanwan grup bai kisim, K1000 Brain Bell gift vosa, K500 Supa Velu Stoa gift vasa na K5, 000 edukesen gren.

Meri winim taitol bilong 2013 bai kisim tropi long

luksave long gutpela wok na antap long en bai kisim wangepela trip long go stap insait long Australia Eksektiv Womens Lidasip Miting long Australia long neks yia.

Westpac Menesing Darekta, Ashleigh Matheson i tok dispela awod em mak bilong soim Westpac komitmen long kamapim jenda balens long PNG.

Mista Matheson i tok ol meri save mekim bikipela wok long developmen bilong kantri na wanwan de ol mekim bikipela wok na dispela kain program na awod i soim i gat bikipela luksave na amamasim wok

bilong ol meri.

Mista Matheson tok, Westpac i kamapim nupela program long givim skul tok na advais long ol meri na tok wina bilong wanwan grup bai kisim bikipela skul tok na advais long long 12-pela mun long strongim skills na save bilong ol long wanem wok ol i mekim stap.

Nominesen fom stap long olgeta bres bilong Westpac benk long kantrina long websait. Olgeta wina bai Westpac tokaut long dina bilong 2013 Westpac Outstanding Women Awod long Pot Mosbi long Trinde 16 Oktoba 2013.



Wantok

Advertise your Business right here!!

We deliver your message right to the remote areas of PNG where others don't go. **Wantok Niuspepa** is your medium to communicate your business now.

Niuspepa Bilong Yumi Ol PNG Stret!!



Call the Advertising team on,

Ph: 3252500 Fax: 3252579 or

Email: wantok.com.pg or Website: www.Wantokniuspepa.com



Kromait long KBK Main i Seif na Nonap Kamapim Birua

RAMU NiCo Menesmen (MCC) Ltd i tok strong tru olsem sampela giaman na kusai toktok i kamap olsem ol stok pail bilong kromite long nupela weahaus long KBK Main i bai kamapim birua long helt na laip bilong ol manmeri na envairomen em i no tru.

Na Ramu NiCo i gat bikipela wari tru olsem wanpela deili newspepa long tok Inglis i kisim dispela giaman stori long wanpela non-saintific websait we nogat save long kemikol tasol i save tok giaman na baksait long ol bikipela mainin kampani na putim long nius pepa. Dispela nius pepa tu i no bin traim long askim Ramu NiCo sapos ol dispela stori em i true or nogat.

Tasol Ramu NiCo we i dikim nikel na kobalt long KBK Main i tok klia olsem Ramu NiCo i husim wankain wei long rausim kromait long KBK Main na ol dispela kromait ol i putim long nupela weahaus em sem olsem ol kromait we yu ken painim long olgeta hap olsem arere long wara, KBK Main, gaten, but na i no gat posin long em. Helt, Sefti na Envairomen (HSE) Dipatmen i go pas long lukautim dispela wok bihainim law bilong kantri na tu operesin plen bilong kampani we i tok aut long Ramu NiCo mas givim strongpela was long em.

"Dispela exavalent kromium (kromium 6) we i stap long kemikol product em i gat posin tasol ol dispela stokpail em ol kromium 3 i go kromium ziro, we i nogat posin. Ol narapela kemikol i mix wantaim kromium 6 bai kamapim posin tasol dispela kain i hat stret long kamap."

Long luksave olsem nogat wanpela birua i kamap na bihainim ol lo stret bilong lukautim bus, wara, graun na abus insait long wara na graun, Ramu NiCo i disainim na wokim wanpela strongpela kromait stokpail ples bihainim klostu tru ol luksave bilong Environmen Permit (EP) na ol narapela approvel long gavaman.

Ramu NiCo tu i disainim ap bilong putim kromait mak long 1,000 skua mita long arasait long haus na banasim wantaim sement wol na sement floa we bikipela bilong em i 30cm na spes i ken holim 160, 000 ton bilong kromite behain long ol i pekim long bek.

Kromait bai i stap antap long sement floa na bai nogat wara i go insait long graun long taim bilong ren. Ol wara we i ron go arasait long ol lik-

lik hul ol i mekim ya bai go insait long sement baret arere long banis sement go insait long sedimentesin pond we ol save man bai testim ol wara long pond sapos i gat posin. Dispela em long luksave olsem stendet or mak bilong posin i daunbilo stret na luksave long kondisin bilong Environmen Permit (EP) behain long ol i rausim wara i go aut. Dispela sedimentesin pond em i ken holim mak long 1,000 kubik mita bilong wara.

"Mipela i no save larim ol wara kam aut long stokpail ples i go insait long envairomen na mipela i bin kamapim planti monitoring wok we i soim olsem nogat dispela posin, kromium 6 long olgeta wok skelim na glasim bilong Kampani. Ol wara i soim olsem posin i daunbilo tumas long mak bilong EP na ananit tu long Wol Helt Ogonaisisin stendet."

Ol kromait stok pail bai Ramu NiCo putim antap long konvoja belt na pekim insait long ol tu ton beg na putim insait long weahaus we i ken holim mak long 20, 000 tones bilong kromait.

"Mipela i wok klostu wantaim bikipela luksave long bihainim komplaience permit bilong EP long bai nogat wanpela bus, graun, na ol abus antap long graun na wara i painim birua."

Ramu NiCo i tok klia tu olsem i gat ol giaman toktok we kromait i kilim ol pis na abus long Ramu Riva em i no tru bilong wanem nogat posin i stap insait long ol kromait stok pail tete.

Ramu NiCo i tok klia olsem kampani ya i bai mekim wok strong long luksave olsem nogat wanpela birua i kamap long environment long tete na bihain taim tu na tokim ol pipol long noken bilipim giaman tok bilong ol NGO.



Ples bilong lodim kromite i go insait long bek.

Kromait peking na weahaus em mak long 5km longwe long KBK Main eria. Ol stok pail bilong kromait arasait i nogat birua long bus, graun, wara na abus (envairomen).



Sement baret i raunim ples bilong putim kromait. Olgeta rein wara bai i go insait long dispela semen baret na go pulap long sedimentesin pond we bai ol i testim pastaim.



Dispela sedimentesin pond em hap we olgeta rein wara bai stap long en na ol i bai testim sapos i gat posin behain long ol i rausim.

Ramu NiCo redi long givim

Insait long moa long tupela yia, Ramu NiCo i sanapim pinis malti bilian Kina Ramu Nikel Projek, na nau mipela i redi long komisinim.

Bihain long mipela i kisim olgeta tok orait na stretim ol teknikal wok redi, Ramu NiCo i go het wantaim bikipela wok konstraksen long namba tu hap bilong 2008. I kam inap nau, olgeta bikipela konstraksen wok long Krumbukari main sait na Basamuk rifaineri i pinis, na projek i stap redi long kisim komisin o tok orait long mekim wok. Long wol tu, dispela kain hariap sanapim em i no kamap bipo long wanpela kain bikipela projek olsem, na i daunim olgeta

salens bilong graun na masin bilong mekim wok.

Ol dispela namba i soim klia mak bilong wok mipela i pinisim:

- Moa long 4.5 miliar kubik mita bilong graun wok i pinis
- Klostu 195,000 kubik mita simen i silip pinis
- Klostu 48,000 tan stil bilding i sanap, hap long ol em ol nupela
- Moa long 2,000 yunit masin i sanap redi
- Moa long 227 kilomita bilong baret na proses paip i silip (antap long 135 kilomita slari paipain)

Wanpela Ramu NiCo, Wanpela Komyuniti

Gavman bai fandim Sepik Agrikalsa long 2014 baset

AGRIKALSA em baksait bun bilong kantri ekonomi, na taim wok maining, gas na petrolium i pinis, agrikalsa na turisim bai stap yet wantaim ol pipel.

Gavman i luksave long dispela, na tok em bai surukim ol risos i long agrikalsa na turisim sekta.

Minista bilong Tresari Don Polye, i tok ol mani inkam o winmani long maining na gas na petroleum bai gavman i investim long agrikalsa sekta bikos moa long 4 milian bliong PNG populesen stap long rurel ples em ol stap turangau laip. Agrikalsa tasol i sapotim inkam tasol em nona na tu ol i kisim kaikai long agrikalsa.

Minista Polye i tok nau em i taim we gavman bai luluk moa long sapotim wok agrikalsa na tu liklik bisnis long growim ekonomi bilong kantri.

Ol agrikalsa bisnis haus na ol lida bilong Sepik wantaim

Minista Polye, long las wik go lukluk raun long sampela agrikalsa projek long provins na Minista Polye i amamas tru long lukim bikipela plet-pela graun long sepik i slip sori yet na em moa gutpela long planim oil pam na tu arapela kes crop.

Mista Polye i lukim dispela i kwiktai tokaut olsem agrikalsa long Sipik provins bai kisim bikipela sapot bilong gavman long 2014 baset.

Tresari minister Don Polye taim em go luluk raun long ol agrikalsa projek long Sepik long las wik i amamas tru na wanbel tru long bikipela graun long hap ken kamapim bikipela agrikalsa projek we bai sapotim ekonomi na laip bilong planti populesen long kantri.

Polye tok dispela projek bai kisim bikipela luksave long taim bilong 2014 baste long mun Novemba dispela yia.

Mista Polye tok gavman bai lukluk long sapotim wok agrikalsa na turisim tu na, i no long ol maining na petroleum hap tasol.

Tresari minista taim lukluk go daun long sepik antap long helikopta, em lukim olsem bikipela graun tru bilong agrikalsa stap yet, na tok gavman bai sapotim. Em tok gavman bilong nau bai sapotim liklik bisnis long groa na tok agrikalsa em bikipela samting gavman bai nonap lusim.

Siaman bilong Limo Holdings Aaron Milijiji tok bikipela tenkyu ya go long Minista Polye na tok kampani planim pinis 98,000 Oil Palm hekta na tok em bai surukim go het long 128,000 hekta long graun.

Em tok taim dispela projek stat long 2010, kampani peim moa long K20 milian long takis go long nesenel gavman na nau gat 500 wokman nawokmeri.



Turuba Oil Pam Industri long Is Sepik

Naispela Tabubil Maket

...Tasol klia long prais bilong sampela samting

Veronica Hatutasi i raitim

MAINING Taun bilong Tabubil long Westen Provins i gat wanpela gutpela liklik maket we i sevim namel long 10,000 na 15,000 pipel long taun na ol ples i stap arere long taun.

Maket i klin stret, na yu ken painim ol naispela na pres mekpas bilong kumu olsem watakres na soko ol i salim long K1 na K2. Dispela em ol bikipela na rait sais mekpas ol pipel bilong ol haiwe ples olsem Ningerum i karim i kam na salim.

Ol asples o papagraun lain i no bisi long maket bikos ol i save kisim ol main royalti peimen mani bilong ol.

I gat ol kaukau, singapo, saksak, banana bilong kukim na ol kaikai mau wan, ol pinat, kokonas, painap, kerot, spring anien, kawawar, kepsikam, saksak, ol bilum ol i wokim long skin bilong tulip diwai, na ol sampela samting moa.

Tasol long dispela maket, bai yu lukim olsem prais bilong kaukau, banana na kokonas i antap moa long ol kumu samting.

Dispela em bikos ol pipel i kisim ol dispela kaikai i kam olgeta long longwe hap olsem Oksapmin insait long Telefomin Distrik, Sandaun Provins.

Oksapmin i stap long boda bilong Sandaun, Sauten Hailans, Is Sepik na Westen Provins.

I nogat rot na em i hat

long pipel i kisim ol sevis. Em i save kisim klostu wanpela wik long wokabaut bihainim bus rot i go long Tabubil.

Tasol ol lain Oksapmin i save go maket long Tabubil i save haiarim balus long kisim ol gaden kaikai na kumu bilong ol i go long Tabubil Maket. Olsem na prais bilong ol kaukau, kokonas na banana i stap antap.

Tasol maski prais is tap antap, pipel i nogat narapela hap long baim ol gaden kaikai, na ol i baim tasol ol samting.

Wantok i bin bungim John Nicolities Kuma, em man Oksapmin, long Tabubil maket na stori wantaim em long rot em save kisim ol samting i go long Tabubil Maket, ol hevi em na ol lain bilong em i bungim long karim ol samting i go long dispela maket na ol gutpela samting we go maket long Tabubil i save givim long em na famili bilong em.

"Mi save salim ol kaukau, pinat, spring anien, kon, seleri, brokoli, banana na ol narapela moa.

"Bikos i nogat rot we kar i ken ron long em pipel i yusim long kisim sevis i, kisim ol gaden kaikai bilong ol na ol ekspot i go long maket, mipela i save haiarim balus long kisim ol samting i kam long Tabubil na long taun maket.

"Pe bilong wanpela sata o haia em long K6,000.

"Mipela i ken karim namel long 200 na 300 bek we

hevi bilong inap long 1,700 kilogrem, tasol insait long tupela de tasol, ol samting i save pinis.

"Bikos long kos bilong sataim balus, prais bilong ol samting mipela i salim long Tabubil Maket i stap antap.

"Mipela i skelim ol samting na long kisim bek mani mipela i sataim balus long en na antap long en, mipela i mas wokim profit o winmani. Long dispela as tasol, mipela i salim ol gaden kaikai long kain prais mipela i putim long ol," Mista Kuma i tok.

Wanpela samting tu em, ol kaukau yu baim long Tabubil Maket i swit moa yet.

Prais bilong kaukau i stap namel long K1. na K10. Mau banana em K2 long wanpela singel banana na wanpela kokonas em ol i salim long K4 i go antap long wanpela.

Mani we Mista Kumai wokim long maket em i yusim long sapotim famili bilong em.

Long wanpela hap kona, ol mama i save salim ol (waitpela) bilum ol i wokim long skin bilong tulip diwai.

Olsem na yumi mas tingting gut long baim wanem samting taim yu go long Tabubil Maket.

Seken han maket i stap tu long sem hap, insait long Tabubil Taun soping na bisnis eria.

Yu no nap long lukim wanpela pipia o plastik bikos loa i stap long taun i mas klin olgeta taim.

I KAM OLGETA LONG OKSAPMIN: John Nicolities Kuma bilong Oksapmin i maket stap long Tabubil Maket na sevim ol pipel i wok long Ok Tedi Main, na ol ples klostu.



OL RAIT MEKPAS: Gutpela na pres kumu olsem soko na watakres em yu ken baim long Tabubil Maket long liklik prais. Wanpela raitpela sais mekpas olsem yu lukim ol maket lain i soim em ol i salim long K2 taim ol i salim sampela long K1.



PINAT MAMA: Ol pinat mama olsem i save sindaun long sait bilong haus maket na salim pinat bilong ol namel long K1 na K5, long skel bilong sais bilong mekpas. Ol Poto: Veronica Hatutasi

Trukai Fan Ran pulim planti lain

OLGETA Yia Papua Niugini save helpim ol spot manmeri bilong yumi long baim ol Trukai T/Sot long amamas ron we Trukai save kamapim.

Dispela yia em bikipela tru, ol bikipela taun bilong yumi long kantri bin gat sans long kisim ol T/Sot long trukai na salim long kisim mani long helpim ol spot manmeri bilong yumi long go pilai long Wales na Futuna.

Pot Mosbi bin kisim planti T/Sot long trukai na long Sande wik go pinis rot bilong Pot Mosbi bin tanim go Yelo na Ret long kala bilong ol T/Sot bilong Trukai. Sampela bilong ol taun tu olsem, Lae, Vanimo, Mt Hagen, Goroka Tabubil na sampela moa bin ron long wankain taim long Sande.

Se John Gais Stadium long Pot Mosbi em ples we ol lain husat gat T/Sot kam bung long statim ron bilong na pinis long sem hap yet. Prais Minista Peter O'Neil stap long dispela taim long kik statim ron.

Long 6-kilok taim Prais Minista parapim gan, nogat kar i ron long wanem olgeta rot bin pas long kala bilong ol T/Sot na ol manmeri go pas bin kam long pinis lain na sampela stap yet long stat lain. Dispela ron i kisin moa long 3-pela awa long olgeta kam bek long pinis lain long wanem planti manmeri na pikinini bilong Mosbi i tek pat long dispela amamas ron.

Olgeta mani bilong ol dispela T/Sot bai go long PNGSFOC long salim ol pilai manmeri bilong yumi go mini Saut Pasifik Gem long Wales na Futuna long Septemba long dispela yia.



Ol Spot Eksen poto long wiken...




Ol Poto Nicky Bernard.

HOLIM PAS: Winga bilong Isapea Karo Kauna i train long takolim bikipela fowod bilong Hagen Eagles Jason Tali taim kepten bilong em Berry Pekaea i kam long bekap.



MAKIM GUT: Kas T bilong Stop N Shop Komados i makim bal bilong em long Midia Pul Kompetisen.



AIYO NEK BILONG MI: Dispela kain takol save bagarap sampela ol gutpela pilai. Joshua Thomas bilong Isapea i holim lek bilong pilai bilong Eagles.

- Weekend Sports Draws -

Digicel Cup Round 12

Home	Away	Venue
SUNDAY, 30 JUNE		
SNS Vipers	vs. Enga Mioks	Port Moresby
Snax Tigers	vs. Agmark Gurias	Lae
Hela Wigmen	vs. Gulf Isapea	Mendi
Bintangor Lahanis	vs. TNA Lions	Goroka
Wamp Nga Eagles	vs. Mendi Muruks	Mt Hagen

RESULTS

Muruks 22 Mioks 28,
Lahanis 36 Wigmen 12,
Lions 18 Tigers 10, Gulf
Isapea 32 Eagles 16,
Gurias 27 Vipers 22

**Lae Tigers i no kisim poin
long 26 - 16 skoa lain
wantaim ol Gulf Isapea
bikos long pait bin kamap
na ol stopim pilai.*

LADDER

	P	W	D	L	F	A	Pts
Lahanis	11	7	1	3	207	176	15
Mioks	11	7	0	4	268	144	14
Tigers	11	6*	2	3	226	126	14
Gurias	11	7	0	5	277	179	14
Vipers	11	6	0	6	258	188	12
Isapea	11	4	2	6	188	242	9
Wigmen	11	3	2	6	157	198	8
Lions	11	4	0	7	158	306	8
Muruks	11	2	3	6	149	215	7
Eagles	11	3	1	6	176	283	7



PULIM TAITIM: Gol suta bilong Esco Telstar i holim bal strong taim Gol difenda bilong Monier Paramana i laik pulim long em.

TOKSAVE: Salim ol spots dro bilong yu kam long Feks; 325 2579, e-mel; bveo@wantok.com.pg o kam lusim long Wantok Niuspepa opis long Able Building Complex long Central Waigani, NCD.



SPOTS DRO RAUN 16

Fraide: Jun 28, 2013

ANZ Stadium



Rabbitohs V^s Raiders



Sarare: Jun 29, 2013



Campbelltown Stadium
W/Tigers V^s Storm



Centrebet Stadium
Panthers V^s Dragons



Sande: Jun 30, 2013



Hunter Stadium
Knights V^s Titans



Mt Smart Stadium
Warriors V^s Broncos



Townsville Stadium
Cowboys V^s Sharks



Mande: Julai 1, 2013



Allianz Stadium
Roosters V^s Sea Eagles




Bai: Bulldogs, Eels

Eksen poto long Stet ov Orijin Gem 2



Raun 15 Poin Leda

Pos	Tim	W	B	L	D	Pts
1.	Rabbitohs	12	1	2		26
2.	Storm	11	1	3	1	21
3.	Roosters	10	1	4	0	22
4.	Sea Eagles	7	2	5	1	19
5.	Titans	8	1	6		18
6.	Sharks	7	2	6		18
7.	Bulldogs	8	0	7		16
8.	Raiders	7	1	7		16
9.	Knights	6	1	8		14
10.	Panthers	5	2	8		14
11.	Broncos	6	1	8		14
12.	Warriors	6	1	8		14
13.	Cowboys	5	1	9		12
14.	Dragons	5	1	9		12
15.	West Tigers	5	1	9		12
16.	Eels	3	1	10		8



FM100
PNC's Information & Music Leader

FRIDAY 28 JUNE



Vs



7:55PM

ANZ STADIUM, SYDNEY

SATURDAY 29 JUNE



Vs



7.30PM

PENRITH STADIUM

SUNDAY 30 JUNE



Vs



7.30PM

HUNTER STADIUM, NEWCASTLE

LIVE GAME CALLS

ALOTAU 107.1	BUKA 100.8	KARKAR 100.5	KIUNGA 100.3	LORENGAU 100.3	MT. DIMODIMO 107.1	NAMATANAI 100.3	RABAU 100.8	TINPUTZ 100.8
AMBUNTI 100.8	DARU 100.5	KANDRIAN 100.1	KUTUBU 100.2	MADANG 100.8	MT. HAGEN 100.3	NCD 100.3	RAMU 100.3	TOLUKUMA 100.1
ANGORAM 100.8	DREIKIRKIER 100.8	KEREMA 100.8	LAE 100.5	MAPRIK 100.8	MT. HOREATO 107.5	NUKU 100.8	TABUBIL 100.3	WATERHOLES 107.1
ARAWA 100.3	FINSCHHAFEN 100.4	KIKORI 100.5	IAGIFU 100.2	MARKHAM 100.5	MT. KAINGUMA 107.1	PALMALMAL 100.6	TARI 100.5	WAW/BULOLO 100.8
BOGIA 100.5	GOROKA 100.2	KIMBE 100.3	LIHIR 100.3	MT. BOREGORO 107.7	MT. TURU 100.8	POPONDETTA 100.5	TELEFOMIN 100.3	WEWAK 100.8

Midia Pul kompetisen kikov

Nicky Bernard i raitim

NAIN-PELA (9) Yia nau bilong dispela kompetisen bilong ol Midia o ol nius manmeri long pilai bilong ol long snuka. Dispela Midia kompetisen bin stat long wanpela liklik klab ol kolim long Klab 22 na i gat 4-pela tim tasol bin kirapim dispela kompetisen.

Bihain long sampela yia long Klab 22, dispela kompetisen go bikipela na ol surukim ples bilong pilai bilong ol go long Lamana.

Dispela nau i pulim tu sampela tim long outsait kam joinim dispela kompetisen, we tu i lukim sponsa bilong dispela kompetisen i bikipela.

Dispela yia Nesenel Geming Kontrol Bod (NGCB) i kam bek long sposaim dispela yia kompetisen wantaim long K50,000 na Benk Saut Pasifik (BSP) i sponsaim ol Refri bilong dispela kompetisen wantaim K10,000.

Dispela yia tu i lukim planti ol midia haus i putim tim bilong ol bihain long sampela



BIKPELA SEK MANI: Nesenel Geming Kontrol Bod (NGCB) na BSP sapotim Midia Snuka long narapela gen. *Poto Nicky Bernard*

yia ol lusim long wanem planti ol outsait tim bin stap insait long kompetisen.

Kompetisen bin kikov long wiken i go pinis wantaim 24-tim i rejista long pilai, sampela bilong ol tim i kam bek long kompetisen em long NBC,

Kundu 2, Post Courier na sampela moa midia tim we i mekim lukluk bilong dispela kompetisen ol Midia Pul Kompetisen.

Siaman bilong Midia Snuka Kompetisen Colin Taimbari tu ol makim em gen long stap

olsem siaman long 9-pela krismas olgeta na dispela mekim olsem long taim siaman.

Midia Pul Kompetisen bai makim 10- eneveseri bilong em long yia i kam na dispela em bai bikipela tru.

Isapea helpim kensa

WANPELA Tim long Digicel Kap, Gulf Isapea i mekim wanpela fanrasing dina long mekim mani bilong Well Women Clinic- wanpela bilong ol Faundesen bilong Cervical Cancer.

Dispela Fanraising bilong pulim planti Binis haus long baim tebol na tu ol wanwan manmeri bin go kamap long dispela fanrasing.

Gulf Isapea bin kisim wanpela ges spika kam olgeta long New Zealand,

foma Kiwi kepten Tawera Nikau bin kam stap long dispela fanrasing.

Foma Kumul na Melbourne Storm Marcus Bai tu bin putim tupela jesi bilong em long Oksen we em kisim mani na givim go stret long dispela Faundesen.

Iaspea bin raisim gut mani long dispela fanrasing na olgeta mani ol kisim bai go stret long Well Women Clinic na Faundesen bilong Kensa.

Taekwondo tim tren long NSW

PAPUA Niugini Taekwondo tim i wok long redim ol yet long Mini Saut Pasifik Gem we bai kamap long Septemba long dispela yia.

Tim Taekwondo nau i stap long Sydney, Australia long kisim ol liklik trening na tu pilai wantaim sampela bilong ol sampion bilong ol New South Wales.

Kosa bilong ol Edward Kassman i tok, ol tim bilong bai kisim gutpela trening taim ol stap long Australia na tu gat sans long stap insait long Spot Taekwondo

Hai Pefomens Menesa Stuart Lee long yusim nupela masin bilong kisim poin.

"Dispela em gutpela sans long ol tim bilong mi long lainim na mi lukim olsem bai gat bikipela sans long mipela kisim planti medol long Gems" Kassman i tok.

PNG Taekwondo trevel wantaim 12-pela manmeri wantaim kosa bilong ol, sampela bilong bai no inap bihainim ol, tasol ol bai stap yet long trening long Pot Mosbi.



Skul P.E. na spots ogeaisesen nidim moa luksave

OL skul long kantri i save lukautim klostu olgeta katgori long prep i go inap long gret 12.

Skul i gat pul long planti ol spotting talen yu ken tingim long painim.

Wanpela long ol gutpela samting long ol skul, em ol i save holim ol yangpela bilong kain kain laip na sindaun, na ol i gat kain kain save na strong. Klostu 99% long ol i save laikim spots tru.

Olsem na edukesen dipatmen i kamapim wanpela kurikulum bilong inapim laik bilong ol dispela yangpela manmeri. Kamap bilong ol pisikal edukesen o PE, na spots apinun, em i kamap namba wan samting long ol dispela yangpela long inapim save na strong bilong ol long spots.

Tasol tude, dispela pasin bilong strongim spots long mak we planti skul long kantri i no save strongim gut PE na spots, em i bikipela wari. Ol i senisim ol dispela wantaim sampela ol akademik sabjek we ol i bilip i gutpela moa long o PE na spots sesen.

Mi no laik westim taim long kros pait long dispela. Mi bilip olsem dispela tupela eria bilong ol pikinini long lainim samting i mas stap long eli akademik laip bilong ol. Pikinini i mas i gat save na strong bilong tingting gut, na stretim skul wok bilong em. Luksave long benefit bilong dispela tupela eria bai putim em long rot bilong lukim bikipela moa wok kamap long laip na skul bilong em long bihain.

Tasol hevi i stap we? Hevi i stap long ol tisa i gat trening bilong PE. Ol tisa i mas gat save bilong tisim sabjet, na tu long ogenaism samting. Ol dispela samting ol i ogenaism, i mas i gat bihain taim ron bilong ol tu. I bikipela samting long strongim dispela tupela sait wantaim.

Mi raunim planti hap bilong dispela kantri, na mi ken tok olsem dispela tupela sabjek eria long ol skul, em i daunbilo tru. Planti skul i nogat PE tisa i gat trening, o wanpela tisa i gat save long tisim na strongim PE na spots.

Olsem na ol pikinini i no kisim stretpela skul. Ol i no lainim ol stretpela rot bilong bodi long muv, na save bilong ol kain kain spots pilai. Em nau, save bilong em long ol dispela samting long em long bihain, i save sot.

Edukesen Dipatmen i mas lukluk long sindaun nau na traime na stretim pastaim long ol arapela kantri i abrusim yumi. Ol hanmak i stap ples klia pinis. Mipela ken lukim ol long ai bilong yumi. Sapos gavman nau i no stretim kwik, hamas mani ol i tromoi long sanapim ol bikipela ol spot fasiliti, bai no inap kamapim senis.

Wanwan skul i mas i gat wanpela PE tisa long lukautim spots ogeaisesen, antap long tisim sabjek. Dispela manmeri bai mas wok bung gut wantaim PNG Spots Faundesen na olgeta ol nesenel federesen. Olgeta provinsal hetkwata mas kamap namel bilong ol skul spots ogeaisesen na tisim PE long ol skul bilong ol. Olgeta provinsal edukesen opis i mas wok strong na sapotim ol skul bilong ol

Olgeta skul inspekta, long ol raun bilong ol, i mas luksave long dispela tupela sabjek eria. Dispela tupela eria bai strongim skul bilong ol sumatin. Ol inspekta i mas go pas long strongim moa trening bilong ol PE tisa.

MMI sapotim tim PNG

MMI Insurens wanpela gen i sapotim ol spot manmeri bilong PNG long go pilai long Mini Saut Pasifik Gem long Wallis na Futuna long Septemba dispela yia.

MMI putim K100,000 bilong helpim Spot Federesen long salim ol pilai

manmeri bilong yumi long go long dispela mini gems.

MMI Insurens tu kamap olsem bikipela sponsa bilong Saut Pasifik Gems we bai kamap long Papua Niugini long 2015. Ol tu save sapotim ol liklik pilai we save kam long PNG yet.



RINIWIM KONTRAK: Edris Kumbuwah, darekta NSI, Mrs Iamo Launa, Minista bilong Spot na SP Gems Justin Tkatchenko i soim ol pepa ol sainim long makim kontrak (MOU) namel long Gavman na NSI long Goroka. *Poto Nicky Bernard*



Moa oil na meat insait



TUNA IN OIL

Mipela kam bek ya



MAROONS kam bek long namba tu gem bilong Stet ov Orijin long winim New South Wales Blue long mekim namba tri pilai bai strong.

Maroons pilai strong tru long namba wan hap long holim ol Blue long noken putim wanpela trai, namba wan trai bilong Maroon kam long tupela minit tasol long pilai we lukim strongpela man bilong Sam Thaiday i putim trai na kik bilong Thurston, mekim Maroon go pas long skoa 6-0.

Billy Slater kisim wanpela penolti bilong ol Maroons long 6-pela minit na Thurston kikim go insait long mekim skoa 8-0.

Dispela skoa mekim ol Maroon i strongim banis bilong na givim mi presa long ol Blues, insait long 6-pela minit long pilai Maroon go skoa gen na dispela taim Darius Boyd skoa namba wan trai bilong em na kik go insait long mekim skoa 14-0.

Ol Blues i mekim olgeta stail pilai bilong ol long traim brukim banis bilong Maroon tasol ol Kwinslen mangi putim gut was.

Maroons kam bek long namba tu hap wantaim olgeta tingting long levelim pilai olsem na pilai bilong senis long namba tu hap.

Tupela pilaia bilong Blues na Maroons bin go long sing bin bihain long ol tromoi han go kam na dispela mekim tupela tim wantaim pilai long 11-pela man long pilai graun.

Dispela mekim ol Maroons i yusim ol spit man bilong ol olsem Boyd we i putim namba tu trai bilong em long nait na strongpela longpela man bilong Greg Inglis long skoa. Dispela mekim skoa bilong ol Maroons go antap long 24-0.

Blues kam bek long skoa tasol taim i no inap long ol we dispela train a kik i mekim skoa stap long 24-6 na Maroons kisim wanpela penolti long kilim taim na Thurston kikim go insait long mekim ful taim skoa 26-6.

Namba tri pilai bilong bai kamap long Julai 17 long Sydney na dispela bai wanpela strong long lukim sapos Maroons ken winim namba 8 taim olgeta.

Ol eksen poto long stet ov orijin gem 2 pes 26

Midia Pul kikov pes 27



PMV OIL BILONG YUMI

BOROKO MOTORS

PORT MORESBY	325 5255
LAE	472 1144
MT HAGEN	542 1933
TABUBIL	649 9048
KIMBE	983 5035
MADANG	422 2659
KOKOPO	982 8193
GOROKA	532 3552

Email: info@borokomotors.com.pg
Website: www.boroko-motors.com

